

汝寧府志卷

人物

汝陽縣

明遂德山有勇力多智畧洪武初授管軍千戶鎮撫每從征討多所克捷癸卯秋與僞漢陳友諒戰死於鄱陽湖甲辰夏命有司建祠康郎山褒卹同時死事韓成等三十有六人德山贈武節將軍驍騎尉封汝陽縣子

趙好德字秉彛幼警敏能文章有經濟大志元季汝潁兵起郡縣多陷沒好德謂其妻張氏曰今元運將終豪傑並起我觀東南有天子氣將往從之遂自和陽渡江謁太祖於金陵語合數稱說不嗜殺人佐平天下戊申

以儒士授陝州同知尋遷安慶知府飭兵治具屹然江  
淮保障歷六年陞戶部侍郎晉吏部尙書明年參知陝  
西中書省上御內殿命坐論治道封三代如其官尋卒  
有司護柩歸篋中僅詣勅十一通無他物子毅另傳

房安字子靜天資穎異年十九徵至京師太祖一見奇  
之以爲北平按察司僉事陞江西按察使文皇卽位安  
與布政使楊運僉事呂升並爲軍卒執告上釋不誅謫  
戍輿州後召爲監察御史福建布政司左叅政安蒞事  
嚴明嘗行縣貪墨之吏望風遁去擢工部左侍郎數日  
出爲山東右叅政同官魏瑛誣安誹謗下詔獄安不勝  
掠治悉引伏合家謫戍交趾安坐大辟會瑛他罪覺並

驗所告安事非實遂釋安召還其家屬改安四川右叅政未幾復改交趾卒於官

梁銘洪武末以父廕改補燕山前衛百戶靖難時北平被圍銘拒戰甚力以功歷陞後軍都督僉事侍昭皇監國於南京坐事下獄已而宥之命往廣東備倭及昭皇卽位陞都督同知鎮守寧夏封保定伯宣德元年從安遠侯柳升征交趾卒於道子瑤襲父爵正統間征鄧茂七有功佩平蠻將軍印平湖貴諸苗景泰間進封保定侯出鎮陝西三邊成化間召還掌都督左軍府事薨追

封蠡國公

趙毅字孟宏好德子博雅多才凡六經子史天文推步

等書無不精詣善屬文工草書隱於鶴庄與處士張一中金子齡相友善家貧里宰索租調無以應有鄰媪曰趙大舍孤峭士非久貧者爲貸三十緡永樂初徵爲工科給事中厯工部左侍郎太宗嘗召與語隨問進規多見采納一日上召侍奕時盛暑亭午汗流浹背卽以手中扇賜之尋兼詹事府少詹事上欲作木牛流馬問羣臣無應者毅獨得其法就便毀製之能行數步八年奉使交趾還卒于途子寬監察御史另傳

趙寬字子裕毅次子天資穎秀博學善賦進士拜御史

按遼東湖廣風裁凜然宣德四年御製雪詩廷臣麻革寬進四十首時掌院顧公合諸御史詩就寬求斧削

年卒於官子通進士通孫繼勳進士宜興知縣

趙敏字子聰毅四子少英邁能文章工書畫年二十舉於鄉授兵部武選司主事正統九年靖遠伯王驥征麓川敏叅謀軍事師旋擢吏部驗封司郎中十四年秋也先入寇中人王振勸英宗親征敏慷慨白於冢宰王直率百官諫止不聽敏遂扈從出居庸關八月十五日次土木日暮風沙起敵兵四集矢下如雨須臾師覆及風止不知車駕所在衆欲南奔敏曰昔嵇紹蕩陰之事諸君獨不聞耶乃易服躍馬而北陷於陣死焉景泰元年詔贈奉直大夫蔭子遵爲國子生時同死難者有太醫院判貴茂者亦汝陽縣人追贈廸功郎

強宏字士客天資明敏書過目輒成誦登正統壬戌進士拜監察御史彈劾務存大體不矯激以沽直會英宗北狩景帝僉監京畿兵馬保障山東紀律嚴明陞山西僉事陝西副使致仕歸闔門養重時論高之子晟秦府長史博雅有文嘗纂汝南舊志

楊威字仲儀父璽洪武間知歸安縣有善政威生而穎異日記千言領景泰庚午鄉薦授霸州訓導抵掌談世務切抱隱憂天順初疏陳十事多見采納明年又上疏劾本州官察貪庸盜賊從橫不能制遺禍將來當必不小侃侃千百言不報後數十年大盜劉六等果起霸州卒如所慮四年遷武鄉教諭五年復上疏陳五事其一

謂徙□□於內地於計非是亦未報雖當路嫌其抗直而識者矐之九年遷永平教授不赴歸年七十卒子元方榆次知縣

李嵩字文明父縉吉安府通判少從楊文貞公游博極群書領景泰癸酉鄉薦除辰州同知城麻陽黔陽兩縣民不知擾洞苗以爭田相讐殺嵩單騎往片言解之苗夷讐服競獻金寶悉卻不受九年秩滿楚民及洞苗交奏復留三年擢鎮遠知府嘗行部遇虎正色端坐了無畏怖虎乃去無何以致仕歸經女兒澗風濤暴起舟且覆嵩仰天祝曰嵩居官不敢欺天罔人如有之天覆吾舟須臾風止抵家發篋惟圖書數卷日以自娛所居舍

德知縣  
壞太守欲爲修葺不聽年八十卒子舉鄜州知州鑾旌

劉紳字大用年十九成化戊子鄉試第一宏治庚戌成  
進士選浙江道御史劾壽寧侯張鶴齡暨興府尉恣橫  
殺人皇后怒愬上前禍且不測賴閣臣營解獲免按山  
東幣矜疑七百餘囚武廟初從諸御史彈劾逆瑾矯  
旨廷杖尋出爲密雲憲副持灌田議與撫臣相牾致仕  
卒

方瑤字國珍千戶所人貌魁梧多力能舉五百斤鼎並  
挽雙弓蓋義俠也正德六年冬霸寇劉良趙鏃等至汝

僉事王玟招集義勇爲守禦計瑤應募隨守備都指揮



余英出拒賊遇於韓庄賊鋒甚銳英懼先奔衆遂潰瑤獨奮力戰手刃數十賊賊皆辟易矢盡刀折下馬撒屋椽復戰賊圍繞數匝攢矢射死時年二十九明年都御史彭澤督軍至聞而悲之令有司致祭仍以金帛恤其家

孔輔字道充其先有思友者至聖五十四代孫元時官汝寧府司理遂家于汝輔幼以神童稱登正德戊辰進士授中書舍人時名孟富遷刑部員外郎鞠獄明允上覽其疏賜名輔蓋以公輔期之也已卯三月上將南巡輔偕同舍郎孫鳳等伏闕諫廷杖三十奪俸半年尋出爲松江知府丁內艱復補辰州世宗改元大褒諫臣進

輔俸一級又以外艱歸起補廣南卒輔天資穎異積書至萬餘卷過目輒不忘所著詩文甚富

楊來鳳字從儀正德甲戌進士初知會稽縣政最擢山西道監察御史武宗將南巡來鳳同諸御史上疏極諫上怒杖于闕下幾死出按陝西卓有風采尋謝病歸杜門掃軌尺牘不入公門衣不綺羅行乏輿馬樸素不殊寒士卒後知府史繼芳至慕其高風往拜其墓宗祀鄉賢

桂祥字子和幼而孤讀書罔間寒暑正德丙子領鄉薦授慶陽推官在職廉直數有平反嘗雪史揮使之獄揮使懷千金往謝祥力卻之遷知泗州有惠政以皇陵功

晉階四品尋擢工部員外郎因母春秋高乞身終養母  
卒哀毀泣血頭髮爲白遂不起所著永思堂稿行於世  
祀鄉賢子有根官太常寺少卿贈如其階

林時字懋易正德丁丑進士改庶吉士授檢討武宗南  
幸與同官上疏極諫及楊慎上言大禮詔杖五品以下  
百八十人時與焉乙酉同修武宗實錄成進編修經筵  
講官先是實錄且成惟迎立等二事未決衆議囂然時  
乃奏記副總裁董祀曰昨聞迎立一事或云由中或云  
內閣誅賊彬或云由張永或云由楊廷和疑信之間湯  
然無據史者萬世是非之權衡固不可以偏重竊意廷  
和以忤旨罷歸永坐罪廢今上方綜覈名實書進二事

必首登乙覽恐將以承真有功廷和真有罪不待左右  
汲引排擯而君子小人進退之機決矣董以白之總裁  
費宏然其言書進天子由是傾心宰輔而宦寺之權輕  
矣進國子監司業科條嚴整門無私謁遷南京通政司  
右叅議尋陞右通政歷官二十年委巷草舍如故卒年  
四十五著作甚富子密元城知縣

張元孝字仲立嘉靖癸未進士授行人轉戶部郎幸罪  
典福建試所拔皆名下士調禮部儀制郎凡天下禮舉  
節孝疏請嚴核不宜濫予皆晉藩嗣封輦金幣京師例  
餽郎中千金元孝堅不受當路愆患之元孝出惡言以  
明其志遂誣以毀冒堂官廷杖四十謫登州丞尋遷知

順德調蘇州卒祀鄉賢

孔惟德字恒甫嘉靖壬子鄉薦明年登進士授南京刑部主事遷本部郎平反甚多尋出知泉州值倭入犯境當事議增餉橫征富室惟德爭之以是獲罪調知潞安期年復爲忌者所讒移兩浙運副尋遷夔州擒巨寇王忠等散其餘黨御史疏于朝將大用之惟德念親老決意請歸庚辰起補萊州賦平役均士民感戴之陞山東副使備兵沂州進叅政分守萊州發有司羅韓貪殘其私人思中傷之乃慨然致政歸閉門課子卒祀鄉賢惟德天性孝友自孺慕以至貴顯孝養二親未嘗少衰曾孫門俊亦以孝稱見別傳

趙賢字良弼嘉靖丙辰進士授戶部郎壬戌擢知順德府未抵任以母憂歸乙丑起補荊州荆適歲大稔賢身行村落計日賑饑仍爲築隄障水疏渠灌田于是荆人無水患大盜楊勝德黃中輩聚衆劫掠賢單車詣壘責以大義賊衆叩首伏罪地方以寧會遼庶人以罪廢武岡署其府事謀危二孤賢械其黨惡數人抵於法叅武岡而易之兩臺及張給諫鹵皆疏薦治行第一丙寅加三品服俸戊辰陞湖廣叅政仍守荊州以父老歸壬申起補湖廣叅政四月陞卽畫楚便宜條上十事復疏救荒四事一一措諸實政召回協理院事歷副都御史巡撫山東晉南京吏部尙書鴻臚亮節所在著稱後致仕

家居年七十有三卒祀鄉賢子壽祖進士官四川布政  
張景字光啟嘉靖癸未進士兩宰劇邑俱有善政擢監  
察御史出按陝西疏陳邊務十事并薦涇野呂先生於  
朝按浙嚴湖山之禁務懲華侈建天真書院祀陽明先  
生置學田數百畝以給肄業諸士丁酉巡視京營謝絕  
請託與嚴世蕃相忤出爲漢中副使尋罷歸卒祀鄉賢  
所著有素華集六卷子孟容以鄉薦爲岳州同知

劉訓字子伊嘉靖壬辰進士授西安推官持廉秉公不  
敢干以私以親老歸起補溫州有權貴人子怙勢恣睢  
欲奪其友人妻不得乃毒殺友人事發太守莫敢問託  
病不出訓遂延權貴人子於廳事置酒談宴密勅吏人

陽門呼訟者至與之對理獄既具卽杖殺權貴人子寘  
其黨於法一郡稱快權貴人大恨思有以中之訓尋陞  
戶部主事遂挂冠歸隱東邨日以詩酒自娛蕭然物外  
者三十年卒祀鄉賢

羊傑字士英登嘉靖甲午鄉薦日習古文子史不屑章  
句累上春官不第授山西榆社知縣調陝西府谷恤寡  
賑乏興學課士民甚德之尋遷鄜州以疾歸貧約自甘  
祖父遺產悉讓勿取隱居城南柳塘村率諸子講性理  
大學衍義諸書夜半不輟尤潛心叅同契內照經諸書  
晚號南溪先生卒年七十三著有柳塘篇祀鄉賢子可  
立太常寺卿可久別傳



石欖字伯材隆慶戊辰進士初授辰州司李執法平恕擢南臺御史累遷西寧副使會撫臣殺熟番邀功欖廷辨面折其奸特轉本省右布政使棄官歸自號西湖釣叟卒年七十有五祀鄉賢

傅一善字浹膺其先自麻城徙汝一善天性孝友禱期冲和爲諸生試每冠軍三世同居事親備極色養親相繼逝水漿不入口七日惟恐墜先人緒堂兄弟欲祈爨膏腴盡讓諸昆惟取其瘠鹵百畝供伏臘焉慷慨賦之多方拯困又其夙性也村居課諸子讀書先以忠孝爲根本仁讓誠樸爲實行村間秀者力不能就塾恒代修東脯無恡客西南之鄙不數年列章縫者百餘人歲稔

不逞聚夥爲盜旣集諭寬共訴曰我輩各自求食豈敢  
爲人洩忿犯大賢之廬盡解去素孚鄉黨一時敬服比  
爲鄭社云子振商官兵部尙書累贈如其官祀鄉賢

羊可立字子豫傑子幼竒穎敦古誼尙節操登萬厯丁  
丑進士授知安邑縣邑積逋十餘年近數萬計可立釐  
其弊具狀當事奏於朝得請遂令里耆計各都圖按籍  
踏丈經年餘前所逋者清覈無隱賦役得均勒石以垂  
久遠會夏縣亦多逋賦當事令可立徃丈其田丈法如  
安邑賦清而民德之五省交薦擢雲南道御史同御史  
李植江東之劾張居正以私憾搆遼東人憲熯獄狀上  
白摘發大奸利在社稷御書盡忠言事賜之復書名御

屏嘉其鯁直按隣兩浙首薦地方人材王錫爵定鹽法  
條劄劾監生朱太英之苞苴吏部陸光祖之請託權貴  
勢要心憚之特擢尚書司卿尋陞太常卿復同李植江  
東之言壽宮事彈申相朝堂悉憚其鋒稜時江陵私人  
乘間謀中之遷大理評事尋出爲天雄司李移瑞陽少  
府皆不携妻子以示便於去就乞休者再張洪陽鄒南  
臯咸曰壯年竒才賜環指日慰留無已迨有遼陽經畧  
之命適臥病不起矣所著有晚香堂詩筠州詩濯纓亭  
集今祀鄉賢子一甲乙酉舉人

張自立字卓甫幼孤貧舉萬厯己卯鄉試第一嘗大雪  
突無煙者數日自立讀不釋卷上舍陳某聞之貽粟數

斛墜不受知府史公中國授室辭里人請免田之租弗  
應張直指簡按豫州還朝謂河南第一人當屬汝陽張  
自立相國沈龍江聘往歸德曰非爲二三子也使里人  
有所矜式耳山左王汝訓山右劉東星皆稱道自立行  
誼不倦五上春官不第仕臨穎教諭卒祀穎名宦祀汝

鄉賢

李呈芳字試春幼孤力學補府學弟子員曾祖母蔡祖  
母詹母朱三世俱寡呈芳折節讀書孝養無間曾祖母  
祖母及母相繼亡呈芳哀毀悲號伏草土者九年先後  
並指督學使者皆旌表之後以子侍御本固官膺封以

家世食貧終身不御絺綺卒祀鄉賢知府王鑑川扁其

門曰節孝又奉詔旌爲三節之門

傅振商字君雨萬厯丁未進士選庶吉士改江西道御史按畿南惡少劉應第煽亂當事有借事倖功者振商檄所司不得株連得解者千餘家劄恒陽國士天雄三書院以造士皆攝學政時事也按晉命下外艱歸及巡視茶馬不俟陞見賚勅邸至里時以爲異數云值陝災荒七監尤甚每監發二百金備穀賑濟閱武寧夏定趙守祿妖人之變戊午監試得人稱最盛內艱闋起大理寺丞轉本寺右少卿遷太常寺卿巡撫南贛歲大荒流寇出沒渠魁邱囊等結衆雄行詔營官李猶龍密授計縛之地方得安政暇接生儒論文藝千里乞詩翰者不

絕秩滿遷南兵部右侍郎時魏黨懷寧侯孫承蔭毒軍蠹民道路以目振商管兵戶二部總督倉塲篆朝夕圖

維極力振刷杜虛冒革索需飛章劾承蔭剋減班軍鹽菜銀八百餘兩奪其俸清營伍衛官二千人碎陳郎中車立擒首事者羣譁立解會以祝釐之後不避險難入

都朝見賜宴陞兵部叅贊機務尙書具疏辭上曰卿練才夙望簡任留樞時事孔棘宜速赴任庚午赴南都軍政次第舉行江左倚爲長城僉曰南都惟見司馬公一人而已亡何引疾乞休蒙旨溫留振商意堅甚歸里自號養拙叟角巾草履依然寒素風著有愛鼎堂文集傳

世嘗誡其子弟有箴曰居鄉黨最要與物無競而薄俗

頽風多非意相干初當之未免不平輒鬱鬱竟日看來  
是涵養未到便與犯而不校心境霄壤以後須加降氣  
法凡遇此等如浮雲之過太虛久之心境不役客氣自  
歛已讀此可見其平生品詣卒年六十八贈太子太保  
諡莊毅賜祭祀鄉賢

李本固字叔茂萬曆庚辰進士授蒲城知縣舉卓異擢  
御史巡視十庫力糾豪璫解組而歸己丑起補雲南道  
監察御史出按三秦懲貪墨劾債帥彈壓強藩威稜大  
著復按雲南時南徼法度廢弛又蠻獠襍處曠悍難治  
本固凜以大義軍民帖服豪右屏跡報命入都同臺垣  
李宗延費必興抗疏請冊立東宮上大怒削籍歸里築

碧筠館著書賦詩不問戶外事光宗初召起太僕少卿  
陞光祿少卿尋與時相忤量移南京大理寺卿致仕歸  
里卒年八十贈工部右侍郎諭祭一壇著有碧筠館集  
及修汝南志子士雅甌寧知縣士朗太僕寺主簿士端  
諸生好學能詩

費必興字應祥萬厯丙戌進士授中書舍人擢南禮科  
給事中同御史李宗延李本固疏請冊立東宮削籍歸  
里寄情翰墨優游林泉二十年光宗初首召及之會卒  
贈光祿寺少卿

李宗延字景指號嵩毓舉萬厯壬午鄉試第二丙戌成  
進士初任湖廣黔陽縣丁外艱服闋補山東長清縣調



陝西咸寧縣八閩棧士得薛觀光左史諸人行取御史  
時太子未立人言洵洵疑上欲立少子福王宗延上瞞  
諫之言廢長立幼非太祖法言過直切上震怒祿幾不  
測賴大臣力救削職歸里家居十八年潛心經史聚書  
數萬卷所著十三經字詁二十卷栩栩軒文集十卷天  
啟初起官太僕少卿未幾擢都察院上疏言宦臣權太  
重郊廟所用樂非雅聲上皆嘉納之陞戶部尙書廕一  
子允豫官生時有邊警持簡戎政尙書又陞吏部尙書  
以年老致仕御書秉銓清正四字褒之馳驛回籍年七  
十三卒差行人張三謨祭奠贈太子太保賜塋地祭田  
廕四子允濟中書謚莊靖長子允華壬辰進士有才名

爲湖陽滑縣知縣皆有善政陞禮部郎中督學山東未  
蒞任卒著有匏菴草星少草檀欒堂詩集數十卷

桂有根字徵實萬曆己丑進士授山東金鄉知縣愛重  
文士巡撫都御史周永春微時爲有根所賞拔三年奏  
最擢工科給事中督修乾清宮值神宗張樂別苑聞有  
根騶從聲顧左右曰桂鬻來也次日以荒淫疏上帝爲  
改容由六科左右給事中遷吏科都轉太常卿遷左通  
政尋轉南太常卿怡情山水十餘年無復求進意樞工  
部右侍郎致仕歸卒諭賜祭葬崇祀鄉賢

吳愈字元冲萬曆戊戌進士初授山西長子知縣調安  
邑有政聲士民祠祀之陞戶部主事尋遷郎中奉通州

大同兩差以清正自持不取羨竒主爵者嘉之遷陝西  
關南道陞山東右布政時邪教倡亂調兵援剿撫軍某  
不知兵苛責將領一軍俱譁愈從容撫慰之遂得安當  
事忌其才尋爲所中致仕號天慵叟崇貞間詔遣官存  
問卒年八十有三祀鄉賢

彭鯤化字飛仲萬厯丁未進士授金鄉知縣以績最授  
御史出按兩浙因病歸起大理寺丞時魏璫煽虐仕途  
舉足陷網吏部郎蘓繼歐忤逆璫意下獄鯤化念鄉誼  
爲餉一餐璫私人議及之禍幾不測幸素以清直著得  
削籍歸魏敗召還職堅卧不起築古香園讀書授徒著  
有古香集柴潭述古帳秘編若干卷弟鯤颺辛酉舉人

石昂字遜之千戶所人父瓚歿昂年十七哀毀踰禮奉  
 母武氏廬於墓側不履城市者三年藁城張知府數加  
 獎異嘉靖初以歲薦授巴東訓導陞扶風教諭課士切  
 切以德行爲先母卒匍匐自扶風歸再廬母墓竟以毀  
 瘠成疾卒後以子漢官贈工部主事祀扶風名宦汝南  
 鄉賢

郭正諤諸生遇寇破汝居人奔竄其母老不能行諤負  
 之賊至令置其母諤不從賊大怒遂俱被害

劉清父母歿後俱廬墓三年毀瘠幾不起有甘露降樹  
 杪郡人聚觀之知府李丕顯至其廬貽以杭一斛清辭  
 曰草土殘喘未敢飯是乃易以麥始受李懸詩廬壁而

去後以貢除浙江按察司知事遷蒲州丞

周永清韓庄農家子幼聞讀書聲甚羨負笈郡城從師肄業誦蓼莪詩心惻惻動歸侍父母疾臨進湯餌父母相繼逝永清哭痛絕水漿者五日鄰里裹其葬事披髮殯臥誓從死地下鄰張自大捐尺地覆茅居之林栢又捐尺地永清得負土築且晝夜號哭三年如一日有巨蛇伴足眠白鵲飛鳴樹上不去黃犬週墓而嗥忽不見竟瘦死廬中妻唐年二十子繩孝五歲繼孝三歲里長泣聞有司復其家歲給粟帛四金

劉引基字晉卿志氣磊落兩目炯炯讀書十行俱下與秦鎬友善文類陸贄詩效漢魏爲郡諸生試必居首後

以貢授江南五河教諭再補湖廣大冶教諭所至課士  
有法人比之胡瑗時大冶令某所行多不公屢面折之  
由是與當事多齟齬同邑大宰李宗延語之曰公嫉惡  
太甚豈明哲保身之道乎引基曰吾當爲陶彭澤耳遂  
挂冠歸汝有余僧者以財雄慎邑生負僧債欲強逼其  
女引基卽時聞于知縣僧立斃杖下閩郡稱快

劉三重性至孝父母相繼死三重號哭毀瘠結茅爲廬  
居墓側三年有賊劫其衣禱三重不知懼知縣姚士恒  
記其事

孔門俊字伯雅甫列諸生父心病以諸子幼弱囑俊撫  
育之時同母弟傑英方六七歲繼母弟彥哲奇方皆在

繩祿俊泣受父言友愛甚篤及諸弟長成皆爲婚娶延師訓誨幼弟竒遂以少年得雋子暹邈另傳

張藻字公兗自立孫家學淵源慨然有繩武之志爲諸生試列前茅博學鴻章士林推重常自謂人倫莫先於孝士行尤重於守故事親備極色養天啟辛酉從父鸞翼同赴秋闈父在途染暑藻爲執蓋蔽日徒步相隨百餘里道旁驚歎母喪值嚴冬跣足履冰人勸之屢弗納哀毀欲絕水漿不入口者數日父卒廬墓側藻手植樹木菁葱茂鬱冬月不凋汝人異之事聞直指旌其門曰孝高阮緒姑之夫桂繼攀重其行每上公車必邀相伴途次邢臺有貴胄具重贄乞文爲賀藻訪其人非端士

反贊辭之子星文府學諸生孫廷謨幼純謹動必遵禮  
綽有祖風

秦鎬字京冢貧性至孝爲諸生試輒第一縣令劉汝康  
嘉其才捐資使入太學肆力于古遨遊晉魯楚蜀間多  
獲古書籍寓吳越十餘載一時名卿皆以詩文訂交歸  
來投老南陔所居有亭臺花竹之勝當事多造訪之鎬  
幅巾藜杖相見惟譚世外事學使潘曾紘以逸才薦御  
史李日宣疏於朝時與江左劉伯宗江右萬茂先楚中  
譚元春同應徵辟鎬堅不就作詩云潁水半瓢巖月細  
桐江一線野雲寬堪笑年來多一事逢人卻勸我爲官  
寇陷城勝之不從絕粒而死年八十有二先自題其墓



石云人間貧孝子地下老書生著頭頁齋集八卷鬢園

銷夏錄四卷輸餉䟽辭坊䟽二冊

朱榮祖初爲郡班役機警有才慷慨好結納時撫軍元  
黔以榮祖磁州通州累有戰功題授遊擊團練鄉勇值  
上寇欲刈四野麥以困斃城內士民太守李燦密授榮  
祖計賺賊入城受賞于城隍廟縛賊首殷守祖等五十  
八人盡殺之榮祖謀力居多常語人曰生平此一快心

事卽有不虞惟一死耳城陷借妻孫氏登樓自焚死

傅孕笥邑諸生也甲申六月袁賊自襄陽猝至弟孕巖  
爲賊所執索其玉帛羸馬孕笥聞卽奔至緝賊曰吾弟  
幼而且貧汝可釋之吾適自南來所携盡付汝孕巖得

逸去筭實無物與賊特假言以脫其弟耳遂被害孕嶺  
子鵬祥歲時展祭其墓

袁永基字綿祚以祖功襲爵汝寧千戶永基性剛直有  
才畧博覽群書尤精天文占驗會闖逆陷汝拒守南城  
賊登陴永基手刃數賊時四城俱陷勢不能支歸與母  
王訣束甲出短兵巷戰賊引眾圍之身破數創死次子  
世允并家丁三人皆與難母王亦投并死

劉鉞字鼎男世有文行鉞天性醇篤與伯兄銷並傳家  
學事親以孝聞家貧以教授爲生每出入必懷果餌奉  
母其子皆不得嘗母死不能成禮稱貸然後備棺槨居

喪三年寡言笑遇嚴冬卽與父同衾抱足而眠者數歲

攻舉子業寒暑手不釋卷領崇貞癸酉鄉薦流寇浸汴  
携家遠避與同邑孝廉吳廣漢孔門奇走楚入吳流離  
顛沛之中讀書課子不少懈聞逆闖陷都烈皇被難北  
望痛哭憂憤成疾卒於金陵

馮駿字萬里家貧其父使駿織屨爲業駿恥之弗就自  
投師授書年已十八攻苦不少懈數年經書明遂教授  
里中生子獻極獻書獻易同受其業獻極獻書甫成童  
卽補學官弟子員試輒冠軍獻極中丙子副車獨駿至  
五十有七始與獻易同補諸生爲人至剛直每談及古  
忠孝事不勝慨慕崇貞壬午冬闖逆薄汝駿窺勢不可  
支囑其子志在必死子涕泣勸之駿厲聲曰忠孝事豈

以貴賤殊乎頃之城陷駿遇賊於縣署門給賊云吾家有糖二甕可啖汝須同我啟之欲歸家辭祖父靈告以今日死甕實無糖賊怒其誑以刃挾駿駿遂大罵且以頭觸賊賊怒甚被害獨慘駿至死罵不絕口獻極先卒獻書棄妻子徧營尋父賊強之從終不屈亦遇害獻揚被擄逃回收父兄尸葬於祖墓人謂駿之死是臣死於君也獻書之死是子死於父也一門二烈馬氏有焉

吳文紳親亡廬墓枯木復生烏鳥來巢里人以爲孝感桂茂諸弟子早卒茂軫恤孤嫠恩禮踰于妻孥郡縉紳舉爲鄉賢

謝仁邑諸生甘貧植德希跡古賢里人服其義行學使

旌以儒官

陰佐庠生母病危露禱泣代母得無恙工部尙書曹亨  
碑記其事

劉三錫母被賊執舉家奔匿錫浴赤身猝救冒刃血淋  
求脫母難知府史桂芳旌其孝

劉一善孝友天賦士民矜式知府史桂芳詣廬請賓于  
庠

李孟祥孟貞弟妻亡不娶里稱義夫子九思以孝聞有  
司累賓于庠

蕭來儀款客于庭偷兒踰垣群僕競摔敲之來儀曰醉  
人也母縛偷兒感悔去

韓賚郡附生伯父死汴獄賚輿櫬歸葬破產贖從兄罪  
學使者旌其義

彭翥謙慎而惠汝人多其長者官睢州倉大使攝柘城  
尉割俸贖囚罪臯人呼爲父母

彭翀蠲金五百剏利津橋于洪河歲餼輸粟六百石知  
縣旌其義

王洲郡諸生嘉靖三十五年廬父墓知府曹科及知縣  
時餼賚有差僉事張四知題其廬

徐沛郡附生以禮自持非義不就王景魁病寄白金踰  
十有二年付其子完娶

李惟朱載賡張雲翔無事跡可錄仍舊志載之

國朝

傅孕岱字玉策振商第三子少穎悟讀書手不釋卷弱冠食餼選貢授尤溪知縣禮士愛民閩邑稱廉明莊任二年以病歸里杜門不預世事惟典籍自娛著有愛靜山房集子鶴祥福建叅政封父如其官

孔門奇字君平萬曆己卯舉人國朝授廣西貴縣知縣縣民苗錯處南山苗韋金寧尤稱桀驁屢叛屢服門奇未蒞任時兵備祖某知府閱某以計獲其妻子繫於獄將請大兵勦之門奇至潯洲府知其事謁知府請曰苗民可以德懷不可以威服聞金寧妻子在獄可釋之俟某到任日曉以大義未有不服者不然大兵一至百姓

先受其累况山谿險峻設有不虞便罷兵無時矣太守從其言門奇更資以衣糧使之先還到任十餘日率從者十餘人入其峒金寧陳兵以待之及見門奇其子識之曰果釋我母子孔公也延至家率妻子羅拜於前鼓歌以侑飲留三日始歸苗人不復反矣後年餘門奇以前任事罷官金寧饋以千金卻不受遂立生祠歲時尸祝之歸里後結廬練江之濱藝黍養畜以奉母又構書室於堰頭寺聚鄉里子弟讀書於中

桂泓字元旭有根孫由官監授廣東海豐知縣縣素稱富庶凡官日用皆里下供給泓曰既食君之祿復浚民之財不可更曰此舊例也泓曰例非朝廷之法自我變之



不亦可乎遂除之海豐瀕海自昔科第甚少泐下車卽  
修整學宮暇日與諸生講明瞿唐歸胡制藝之法丁酉  
科登賢書者六人黃易陳龍震龔天貴林之樵黃道珪  
朱紫蕃戊戌會試黃易捷南宮嶺表傳爲盛事商人毛  
奇有海船十餘往來日本琉球諸國有仇人控於臬司  
誣以通倭委泓審之毛奇願饋以萬金泓卻不受竟白  
其寃奇感激涕泣以千金爲立生祠朝夕拜視焉後以  
鹽課註誤罷官本於嶺囊無餘財以士民資餽妻子始  
得歸里海豐人士頌其清廉

傅鸞祥字鳴和振商孫以廕補主事豫王下江南授嚴  
州通判又調湖州通判時崇德縣水寇仰七聚黨千人

劫殺商旅奉上臺檄緝捕鸞祥率民兵夜入其巢穴擒  
之餘黨遂散擢太原同知 國初頑民弄兵屢起大獄  
鸞祥有明斷才上臺咸倚之止治其渠魁脇從者盡釋  
之擢寶慶知府時詔天下令條陳地方利弊鸞祥以寶  
永二郡食東粵鹽不便陳之蓋淮鹽由長江達湘潭一  
船可載數萬觔故其價賤粵鹽由郴州達湘潭水淺石  
多往往覆溺故其價貴深山窮民多有淡食者粵鹽院  
以受淮南賄賂題忝官幾罷部卒從鸞祥議民歌頌之  
竹房寇李來亨叛詔四省兵討之湖省知府分地督催  
軍糧鸞祥駐香溪去賊不及百里軍需獨不匱露處年  
餘勤勞最著諸上臺咸褒嘉之賊平擢天津道以事註

誤未蒞任總督蔡白其事候補歸里鸞祥同產兒鸞祥  
字子獅官山東叅議皆天性孝友事母極孺慕之誠母  
疾病則涕泣不食終身如一日所得俸祿皆與諸弟共  
之家無私財至今汝郡稱孝友媿媿不置云子四世詰  
字二吉少聰穎以廩貢授大名河捕通判發奸如神盜  
賊遠遁臺使屢褒嘉之後補任雲南麗江通判齋表入  
覲以疾卒於彰德途次

孔邁字陶種辛卯登鄉薦乙未成進士授慶都知縣陞  
禮部主事復擢員外郎晉郎中出知金華府金華俗靡  
侈邁示之以儉服食淡素屬官來謁者一飯之餘無他  
宴享俗好訟一詞牽引數十人邁廉知其弊凡誣告者

多反坐之期年而訟簡以前任事罷官後事日以原官歸里年甫四十餘絕意仕進人服其高尚每行市中無車馬僕從見者不知爲二千石也

劉元範字石芝元琬與兄元瓚元琛皆少傳家學戊子舉于鄉己丑聯捷進士授岳州府司李時洪內閣承疇經畧湖南岳州最爲衝要元琬立刑兼督軍需事事立辦洪每重其才行取入京授工部主事分司南旺凡山左泉水元琬皆親歷其地運河無淺淤之患晉郎中未及考授浙江督學浙固人文淵藪然亦不無請託元琬止以文章爲去取雖拂當事之意久之亦服其無私事

竣卽歸里優游林下者二十年杜門掃軌終日以典籍

自娛鄉黨稱其長厚卒年七十四子士驥清遠知縣愛  
民課士條教詳悉臺使交章薦陞奉天通判士驥甲戌  
進士

李士雅字大雅本固子幼嗜學齡年食餼歲貢授平陰  
訓導擢武陟學正課士有法數年中登賢書者數人如  
李如蘭和泰王化鶴皆及門弟子也撫按交薦授甌寧  
知縣時七閩初隸版圖縣爲南北衝途大兵往還無虛  
日凡夫役糧草皆取之民間士雅極意撫綏軍需不匱  
而民亦無蹂躪之苦卒於閩妻子歸里止圖書千卷而  
已著有依隱齋集沁園華榆山近稿諸書

王國棟字廷標邑諸生秉性方正學崇程朱汝中士大

夫咸敬禮之子澤字恩朴幼習儒業以寇亂廢學惟圖  
 菽水承歡國棟歿澤哀毀成疾幾至殞生嘗語其子嘉  
 孝嘉信嘉禮曰祖父未竟之志望汝繼之嘉孝已酉舉  
 子鄉授鳳翔知縣祭告先壙泣謝祖父教子孫讀書今  
 徒三牲五鼎耶不勝悲愴人稱其孝友嘉信教諭嘉禮  
 歲貢生

傅振聲字彥方邑附生事親敬兄庸行克敦長厚之名  
 藉藉人口三赴省試不售構河上草亭琴書自娛修野  
 豬岡南大石橋嘗遇賣子鬻妻者輒周全濟之素慕馬  
 少游之為人嘗語人曰人生何必高車駟馬但願力行  
 善事足矣年九十而卒

李士朗字孔昭本固子以父廡任南太僕寺主簿時流  
寇已渡大河陷沒廡鳳州縣有擾勦總兵某過滁乘亂  
掠子女玉帛滁人奔竄州刺史畏怯閉門不出士朗語  
百姓曰爾無恐卽見總兵謂之曰國家遣兵衛民非害  
民也今縱兵蹂躪地方獨不畏朝廷法乎總兵下令嚴  
禁一州秋毫無犯滁人德之立祠豐樂山至今尸祝之  
後歸里以病不出

羊璘字長玉可立孫少爲縣學生工詩古文詞及書法  
磊落瀟灑有晉人風致弟琦游宦四方父玉柱年垂耄  
璘璘依依膝下不敢遠遊年七十餘以歲貢終所著有  
菴叟詩集六卷重纂府縣志若干卷

李孕琦字一韓幼穎悟年十三補弟子員知縣劉稱爲  
神童原慤謙恭里閭重其行誼晚年以拔貢授清源知縣  
抵任三月卽罷歸教授門徒造詣益醇三舉鄉賓年七  
十餘卒

孔暹字晉永門俊子與弟邁遊相師友闖賊破城欲殺  
其父暹哭以身代獲免苦嗜書雖兵戈饑寒疾病中手  
不釋卷工詩古文詞與弟邁先後成進士除授宣化知  
縣講約修學勸輸將建城樓積穀備饑發米賑獄惠政  
甚多營兵鼓噪城外暹單騎入營諭以大義兵卽馴服  
有散給僞劄者止罪爲首全不株連無辜甲子分校秋  
闈所拔皆知名士內召入京授戶部主政歷陞刑部郎



中以病歸里著意園草十餘卷年七十九終子毓基諸  
生能世其家學

楊世清字君厚位孫七歲喪父號泣如禮未幾母歿祖  
母撫之成立補縣學生會闖寇陷汝祖母年老不能行  
世清抱負逃竄時值深冬苦寒得敗絮衣祖母始免僵  
仆後僞官金有章下令考試茂才授職規避者處以極  
刑世清執卷潛泣托以暴中惡疾不能執筆獲免遂避  
居西村躬耕自養教授生徒多所成就性恬淡喜怒不  
形於色暇則執一卷以自娛臨鍾王帖勁秀有法時人  
寶愛之居家嚴飭凡歲時伏臘凶吉大事俱遵古禮知  
府熊仲龍重其德行延爲鄉飲大賓卒年七十四子永

昆乙酉舉人永錫戊午舉人

羊琦字羣玉可立孫少嗜學試輒高等值城陷後困苦  
流離衣食往往匱乏執一卷咕嗶不休時人多非笑之  
琦不以介意中順治戊子鄉試己丑聯捷進士初仕歸  
德府教授以瞿唐制義法教士士多掇巍科焉擢國子  
監助教分校北闈取士多名宿遷吏部主事出爲井陘  
僉事兼管三關兵馬每歲餘餉若干琦卻不受引年致  
仕父老攀轅遠送皆爲泣下年七十三卒

戴鵬字六息幼穎異試輒冠軍家素貧能自樹立焉年  
四十膺歲貢不樂仕進家居教授重義氣撫孤排難不  
求其報晚年益甘淡泊杜門讀書不置家人產業年九

十三卒

牛茹字仲若宣之曾孫母韓氏守節撫孤家貧茹苦力學遂成名士累列前茅登癸卯鄉榜授汝縣教諭訓士有法丁內艱服闋補陽武門弟子日衆執經受業者數十人戊午分校楚闈鄉試後卒于官

周試字勉之淳謹好施動循矩度人皆以爲有隱德子呈兆貢生遵其教凡修橋建廟濟貧息爭諸善事皆力行之

袁世振字子麟前明世襲千戶承基于幼力學制藝外能博覽爲古文詞戊子選拔入貢訪道於雲谷先生得伊洛之傳授徒不仕從遊多知名士曾修府志所著有

陶菴集

董三策字景舒縣附生恭將朱國強訪聘理事肅兵安  
民萬姓安堵年五十而終繼妻田氏守節撫孤子羽宸  
翼宸俱爲諸生

崔延之字耆徵三歲喪父母李氏教育成人補弟子員  
負氣節以古道自處家貧舌耕養母每得甘旨必先進  
母年八十餘而終

賈學易字心周端方正直學業充裕好善樂施試童子  
科年甫十五家忽遭變院試時作十月蟋蟀入我牀下  
經義爲學使所賞遂脫父於難人競竒之事親孝無兄  
弟能以田產分給諸姊見利不苟取忍人所難忍名其

室曰習厚堂與侍御彭鰈化交厚甚重之聞其文輒曰  
科甲材也卒如其言

柯棟字良佐諸生廉介自持博通古今從游弟子崢嶸  
鬢序數十餘人嘗誨諸生曰名爲儒者必須存心中正  
務學聖賢中人切不可欺世盜名有愧屋漏城陷賊遇  
之多呼爲老相公年七十三卒

李尙苑字宸培幼孤而貧事孀母王有孝名博學能詩  
工圖章書畫痛母失明徧求空濟不得憂鬱成疾以諸  
生抱才未遇賈志以歿

桂繼攀字世叔有根第三子穎異不凡中萬曆己酉鄉  
舉九上公車不第授山海通判軍餉發輸得當經畧范

志完奏改軍前贊畫同知議多奇中屢奏捷功革命後授宣府同知遷大同知府尤多建立尋陞陝西洮岷兵備副使習叅政恬澹自守飭體寬大致仕歸里囊橐蕭然見汝中類遣兵火蒿萊滿目因出俸餘贖宗族鄉黨悉蒙惠焉生平性嗜古金石遺文醫藥星輿諸書靡不蒐討卒年八十一

張星文字六星少補府學生類慧負義氣潛心典索明末逆闖陷汝身罹賊營見有幼婦抱小兒者賊將殺其子而虜其母因冒死救之賊怒數刺其股遂跛一足後劉洪起剪滅沈營執鄰人顧姓臨刃星文爲涕泣求生持

刃者感觸釋焉有弟星瑞亂後爲僧栖止吳越間星文

棄田廬尋訪歸汝藉硯田以給朝夕有餽之金不受汝  
人高其行詎羊觀察琦爲作張隱君傳卒年六十一著  
有適園彙

傅鶴祥字子壽兵部尙書振商孫尤溪令孕岱子也以  
尙書廕由地官郎出守兗郡下車伊始首先教化服暴  
摘奸齊以刑政二載而兗大治迨調補湖北德安時楚  
省裁兵生變德郡適當其衝爰督率紳民防守扼要潛  
遣壯士知會將軍于應城賊方西向鶴祥乘虛直進擒  
獲數人餘黨皆散他若賑饑息訟修學宮立書院諸凡  
廢缺煥然一新轉陞福建巖司閩省舊額鹽課僅六萬  
餘視事之初宿逋尙五萬有奇商困課虧細察弊端立

法歸稱分縣鹽必進倉票無重照掣放之欺鹽法大興  
委署臬司執法無私遷叅政八閩重兵所戍動用糧餉  
數倍他省持籌餽運無少匱乏軍儲有餘及丁內艱父  
老泣送歸越一載年七十五卒祀鄉賢

凌四達性廉直好施予有汝州武進士劉光進被仇誣  
陷四達憐之撫其子其昌成立爲諸生人稱其義

李統恬澹閑雅里稱閉戶先生愛宏菴書而筆能肖之  
年八十三知府請賓于庠

楊應祥字瑞徵清慎自勵沉默寡言博極群書雅精文  
藝學使曹履吉嘉其德行

張崑字伯玉孝友性成博稽文史幼從祖遊京師賢士



大夫器重之未幾歸絕跡市肆尤精王氏準繩方書能起人沉痾等症知縣楊義請賓於庠年七十有一子馨雋於鄉

周倌字巨卿以歲貢宦武陟訓導與諸生講論皆程朱語鈔學人造就甚多

周儒字名卿爲諸生優行需次歲貢淹貫六經尤精於周易日與諸子講論每漏下三鼓不輟一時名士多出門下

陳大毅字君可確山籍歲貢生九歲時值流寇難出奇策衛母稍長奮志力學官鞏縣訓導課士有先儒風子琮字伯瑞亦歲貢生爲人恬澹事親以孝聞娶柯氏有

廢疾無子家人勸置側室琮不許曰妾非其人恐遺脫  
輻憂也後以姪爲子孫朝俊另傳

易肇乾字象次其先世有謙者爲崇府審理家于汝遂  
占籍少穎異好讀書交游多知名士山縣學生中康熙  
甲子武闈第一晚年閉戶著書喜談易每言爻象動變  
竟日不輟著有嵩屏集

彭澤長年十二補諸生猝遇流寇難抱木主奉親遠避  
中遭親喪哀戚毀容者數年讀書以終其身

王嘉孝字孚人康熙己酉舉人官鳳翔知縣鳳翔舊無  
志書嘉孝至搜羅文獻哀輯成書

周天辰字撫五性聰慧工書畫拔貢生官汜水教諭

傅敏字修來爲人清介事親極盡色養教子文行並飭  
府學廩生不預門外事鄉里稱爲善士子錫鞶貴如其  
官

張醇字瑜酢家貧授徒多所成就爲人排難解紛以歲  
貢生終

張士端字兆申性敦孝弟中康熙甲辰舉人授蘭陽教  
諭二年應禮部試將入闈父訃音至徒步奔喪歸服闋  
補桐栢教諭課士嚴而有法

胡映葵字扶年舉止端凝博覽羣籍能讀漢唐古文以  
拔貢生

廷試授知縣職歷任江蘓青浦長洲吳縣丹陽丹徒知縣

旋調浙江烏程居官廉潔自好均有惠政致仕歸卒子  
賡南諸生能世其家學

劉以義字敬立少孤事母以孝聞以鄉舉任滑縣教諭  
改睢州學正課諸生學行並飭士風丕變爲文精嚴有  
法子溥澍潛皆歲貢生潛任偃師訓導

尹士偉字人龍八歲喪母事繼母無異所生父母歿茹  
素不御床蓆大祥後聞人呼父母聲猶悲愴如初喪撫  
異母弟成立善鼓琴家貧課徒力學以恩貢終

桂聯科字南宮爲人謙和好善樂施凡三黨親族待之  
皆有恩惠

傅世磊字及石性質直負氣好學能詩以貢授鞏縣訓

導

傅謨字廉斯年十六補弟子員尋食飯好學工書扁戶  
讀書二十年母病朝夕不離左右歲貢授洛陽訓導子  
錫信乾隆庚寅舉人封邱教諭

欽賜翰林檢討銜孫應奎與父錫信同榜舉人另傳

趙承業字憲蒼以孝友稱

葉中幹字子徵以貢選洛陽訓導洛陽舊無學廡中幹  
捐資建置興修學校初家居時鄰有何成者負貸無償  
願以己女爲婢中幹立遣歸取券焚之孀婦宋貧且老  
中幹恤之終身

傅錫馨字摺笏刻苦力學中已未進士選孝豐知縣改

天河北疆重地政尚清肅防奸察盜賊斂跡固常  
空攝羅城事吏胥舞弊錫盤立發其奸以內艱歸卒

鍾鐸字仲立性醇厚事親甚孝謹析產時以腴田讓兄  
雍正甲寅歲大稔輸穀三百石助賑縣官式其間以州

同終

趙上玉字蘭存事親以孝聞與兄友愛甚篤選拔貢生  
任臨穎教諭乾隆四年歲饑縣令以公出上玉曰百姓  
饑且死敢拘乎常格不救耶星夜向州守白其事即日  
賑恤其他勸理河工委捕蝗災皆以實力任之

胡耀南字叔遠乾隆丁卯與兄紹南同舉于鄉壬申成  
進士授新昌知縣奉檄會審大案發奸如神留心民瘼

不名一錢

雷舒聲字叙九諸生七歲喪父事母以孝稱嘗作嬰兒態以娛母母卒寢苫三年工書法董文敏

葉中植字子培歲貢生選臨漳訓導修理學校創建書院以疾終於官子鴻升歲貢生

郭元羨字調鼎諸生性嚴峻篤於孝友父老喪明母病卧床褥元羨身侍湯藥百方調理兄玠以事遣戍三千里外元羨往返省視者三年七十五卒子毓文乙酉舉人

孔傳謙字元讓少通經書因病廢學妻亡不再娶子繼鴻癸酉舉人彰德府訓導

陳昌言字禹拜諸生天性醇篤親歿逢諱日祭祀必涕  
淚終日置祭田以供宗祀舉鄉飲賓

郭元始字揆一年十五時夜有盜劫執其兄拷掠之元  
始奮然以身救之賊將縛其父元始以布繫樓柱負父  
絕地戊寅歲大飢日給米村中老幼子令儀乙酉舉人  
傅讓字穎思讀書目下數行寃心宋五子書爲人重然  
諾厲廉隅以能詩稱選拔貢生中丙辰副榜選郊縣教

諭

傅誼字孝貽以進士授零陵知縣再任整屋平生博覽  
羣籍能詩工書弟訪字刻舟工書行楷無不能作畫無

俗韻



商文超字軼羣少能詩選拔貢生中丙子舉人挑選以  
知縣用分發浙江試用署江山義烏知縣所到有聲  
孫枝桂字培高溫文爾雅爲諸生有聲以拔貢生中乙  
酉舉人丁外艱哀毀致疾而卒

孫巖字魯瞻讀書善悟爲文春容大雅雍正壬子舉鄉  
試第一乾隆元年舉孝廉方正未及赴部父母相繼歿  
巖居喪一循古制戊辰成進士授文縣知縣文居萬山  
中多虎患巖至卽爲文告山神約盡驅之有兩兄弟爭  
訟訛之皆諸生巖各給紙筆命題作其爲人也孝弟文  
一篇二人構思良久相抱大哭求息訟其爲政寬而有

法大都類此

胡紹南字仲通號衣菴乾隆丁卯舉鄉試第一戊辰成進士官刑部主事遷員外郎改御史出典陝西湖南兩省鄉試得士如今韓城相國視學楚北奏請鶴峯州長樂縣設學校持節南漕兼察河務奏請挑濬蓄洩法後再入秋曹以郎中出知寧武府調太原遷冀寧道居官力持大體冤獄多所平反引疾歸里卒子殿襄已酉選拔貢生官偃師訓導

陳朝俊字千長少孤事母以孝聞通易理取漢唐宋數十年講解息心鑽研嘔血而止知府徐表其廬世德躬行子諤歲貢生諸舉人

蕭宗曾字貫一與弟宗思同補諸生討論經集能辨別

音韻居鄉紛難排解皆其力以副榜任葉縣教諭

葉秉德字吉士父鵬升積善好施秉德由附監生入貲授山東鹽課大使調運司庫使擢萊陽知縣廉節自持爲政一本仁恕丁外艱歸服除補霑化有益夥衆劫民日晡多閉戶藏匿遁鮮行者廉得其巢捕誅之以疾乞歸

郭令文字良宜邑諸生性至孝父疾籲天以身代設家廟以營祭祀置義田以贍族人

胡依仁字麟性諸生制行端方與人不苟年近八旬猶閉戶勤讀不輕假人以辭色於乾隆二十年舉鄉飲賓知府王錦嘉其行表其門曰接人以義

劉巨伯字景范爲人履方謙退好善樂施三黨親知待之皆有恩意以國子生例授縣丞職子耀祖年十五補府學弟子員以歲貢入成均孫鼎邑諸生

孔繼鴻字漸遠乾隆癸酉舉人少貧與弟庠生繼庸無分財揀選知縣借補彰德府學訓導弟姪偕往所獲俸不爲私積力舉七喪以孝友稱

王承命字三錫乾隆丙子舉人分發貴州知縣署廣順州苗頑望風懾法補開泰縣擬薦卓異以事改州判署廣西象州罷歸林泉詩酒自娛

李焯字曉南乾隆庚辰舉人丙戌進士分部銓曹歷任兵科給事中巡視南漕多所澄汰征逆回叅議軍前事

捷授青州知府調濟南鎮密廉靜果斷有爲而不露圭  
角幼從其兄灼授書長得肆志文學不以家貧累皆兄  
之力也恭遇

覃恩請貤贈其兄爲青州知府以報焉緣屬員事累罷旋卒  
劉廷棟字奕閣乾隆庚辰舉人歷任郝縣桐栢教諭誤  
士率以敦行爲先癸丑截取知縣以兄歲貢廷恪之喪  
痛深邁疾未任卒

傅應奎字汪平弱冠食餼乾隆庚寅與父檢討錫信公  
同科舉人辛丑分發陝西知縣署耀州補韓城縣興山  
利除水患民咸賴之政暇與多士講論不倦捐俸建書  
院衆請以汪平名之以卓異陞雲南石屏州調任阿迷

開闢水田以利民改署廣南府廣固苗蠻雜處稱難治  
至則焚香自誓清白以誓文寄父父嘉之早年失恃事父  
百計承歡甫謀迎養尋以察邊遭疾卒力不能歸質產  
以治其喪

傅應言字耀平乾隆之酉拔貢甲午舉人性英敏博學  
雖醫藥地理涉焉卽精佐從兄應奎官事無私積丙午  
歲汝邑荒斗穀錢千餘施粥濟貧人僨旅舍以安之計  
口分給有患疫癘者修藥餌親率僮僕分給多所存活  
死者胥爲掩瘞知府武先慎義之以銀百五十爲助屢  
薦春闈未第壯年卒

傅錫類字繩祖歲貢生文宗先正持躬端謹任商水縣

訓導修學宮經費巨萬無所私費有不支捐貲以竣事  
年七十六卒於官士紳送喪於其家

桂大成字集若邑庠生例入監少孤祖聯科家教甚肅  
成恪守恂恂自下祖歿哀毀骨立以孝稱

上蔡縣

明馬驥永樂乙丑進士改庶吉士授戶部主事遷浙江左  
叅議銳意興除豪奸斂手時有運官以金絲絡珠爲佛  
像而餽者驥忿然杖而遣之人服其義正統中以考績  
至京卒祀鄉賢子昇遼州知州孫駁南臺御史另傳

張琳字叢玉父晟有隱德琳奉其父訓好學不倦領景  
泰癸酉鄉薦授蒲州同知遷湖州通判有廉名居六載

求解職湖民遮道泣留歸謝世事日以講學課子爲事  
五子俱登科卒祀鄉賢弟瑤成化庚子舉人知廣濟縣  
有惠政

李遜學字希賢成化丁未進士改庶吉士授檢討侍經  
筵充丙辰會試同考官出爲浙江陝西山東三省提學  
副使遷太常少卿兼翰林侍讀署詹事府事累進禮部  
尙書大學士敷歷中外三十餘年忠清端亮始終靡間  
尤以文辭著卒謚文簡著有悔軒稿

張維恕字子行正德辛巳進士授丹陽縣令擢山西道  
御史時屯政久敝大司徒請以御史監其事恕往清理

彈劾不遺餘力繼按淮揚風采益著竟爲忌者所中出



爲山西副使以內艱歸起補湖廣會迎梓宮於富池驛  
江漲失期上怒逮繫詔獄有獄吏事之甚謹先是惟恕  
按部維陽一小吏有過欲加之箠楚吏曰仕路窄狹惟  
恕笑而舍之卽獄吏也尋得釋歸構蘆崗別業陶情詩  
酒卒祀鄉賢

劉光國字賓卿幼孤貧母王氏以紡績資遣就學中隆慶  
戊辰進士授太原推官渾厚精明能斷大獄有盜入人  
家劫財殺主三年不獲直指以屬光國乃悉呼其鄰人  
至潛察一人色動大聲曰殺人者汝也奈何以累多人  
一訛而伏衆駭顧以爲神癸酉徵拜監察御史因旱陳言  
欲停楚字不急之工上怒切責都諫賈某疏救之奪俸

一年出按陝西畿南所至發奸宄懲貪墨風采凜然以  
內艱歸免喪除順天丞改陝西副使會奢會西犯河湟  
上令經畧督府詢謀可當大事者因其推光國是冬擢  
叅政駐金城壬辰擢按察使駐湟中皆深入絕塞治兵飭  
備有捍禦功會有寧夏噶劉之變官兵攻圍年餘不下  
餽餉告急光國自臯蘭城下筏經行塞外芻糧軍器絡  
繹不絕後寧夏叙功擢僉都御史巡撫陝西罷歸卒

雷雯字煥章正德戊辰進士初授行人陞戶部給諫論  
事激切風采凜然繼而盜發畿甸王師致討雯奉勅紀  
功至則誓諸將曰凡吾所以來爲安民計耳若等務一

乃心力以克有濟無輕敵無養寇無妄殺無辜時有巡

撫某縱所司殺人以邀功要劾其罪軍中無不股慄民  
有陷於脅從旣獲莫能白白髮爲之辯其枉前後所全  
活者甚衆事平武宗嘉之宴賜特厚後乾清宮災震陳  
弭天變十匹事指斥乘輿皆人所不敢言者以疾告歸  
卒祀鄉賢

馬敷字子抑少豪宕不羈貞志節中正德辛巳進士授  
兵部主事改南臺御史率諸道御史上疏論前吏部尙  
書王瓊十大罪乞罷黜以謝天下武宗怒令緹騎逮敷  
等至闕下杖詆諸御史有死者敷始終無撓辭謫判興  
國州遷知蘓州府雄才敏斷處之裕如暇則與學士大  
夫登虎邱泛太湖杯酒嘯咏一旦解印綬歸日從朋舊

爲泉石游不復問人間事所著有著臺集

冀夢曾號竹軒以書名能作文字能詩賦以吏員官濬  
縣丞丁艱歸服闋補榆社遷階州同知州素無學校夢  
曾請立學宮以教養士因疾告歸子懋中字元樞萬厯  
甲辰進士授博平知縣政聲大著調益都以卓異聞丁  
內艱歸服除補滿城遷南刑部主事尋擢郎中出知臨  
洮知府陞西寧道乞歸

胡遵化字蔡一萬厯戊子舉人已丑捷進士授楚陽知  
縣居官清慎不避權貴請改教職選潞安教授遷順德  
推官以終養告歸

劉時寵家貧好讀書事親以孝聞崇禎壬午闖賊破蔡

城父宗禮命時寵曰吾老矣不足惜子盍攜家人逃  
或可免於難也寵涕泣不忍去父意見時寵以爲已不  
逃乃自刎死寵見父自刎仰天大慟同妻將三女一子  
盡刺殺之夫婦隨自殺有妹已嫁馬兆麟因亂來約與  
偕逃見一室之內尸體枕籍抱而哭之亦自殺

朱儉字子珉天性至孝幼孤每父忌辰輒卧塚大慟向  
母問父形容繪像事之景泰癸酉春母病儉日侍湯藥  
中夜籲天願以身代旬日母卒哀毀骨立及葬負土哀  
號結廬墓畔久之枯楊生枝白雀數十翔集其上天順  
三年撫按上其事詔有司建坊旌表

張伊字宗尹爲諸生知府張見而器之延爲諸子師領

宏治辛酉鄉薦赴春官不第就官井陘教諭復遷蒲城  
知縣因母病歸服闋遂不仕或勸之伊曰昔之捧檄爲  
養親也今二親俱逝豈復爲溫飽計耶臺使聘主大梁  
書院子孝平定知州

蕭鑄知撫寧縣姿性溫良篤於孝行母性畏雷及母死  
鑄每聞雷輒泣於墓側如玉哀事

張址字淑玉爲諸生崇禎九年流寇犯蔡址同父文炳  
避難址被擄文炳曰兒必遇害我老矣雖生何益不如  
聚首泉下竟投賊壘賊遂殺之初址之被擄也以父尙  
在隱忍求生後聞父被害輒號泣罵賊賊斷其髮以示  
之曰汝若復罵當斷汝首址不懼罵益厲賊怒決其舌

刺其齒不能出聲猶與目戟手聲息甚壯賊乃劓之并  
斷其手死無完體

曹震南崇貞十六年間賊至欲其負糧震南乃不從賊  
買糧罵賊而死同時有趙應運李思顯彭凌碧周奭葛  
祥生父子俱生員皆罵賊而死

袁忱字誠甫幼習儒業家貧廢學治岐黃術尤精於痘疹  
自發熱卽逆斷後日論症若目覩汝蔡數百里內外所  
全活小兒甚多不受謝儀周急濟物廣行陰德故人欽  
其術

權山縣

程文字載道少聰穎未冠舉於鄉登成化辛丑進士授

知舒城縣民咏歌之擢南臺御史累遷太僕寺卿南京  
右通政使屢疏劾逆瑾皆留中不報歷仕三朝以忠謹  
著稱當其居憂時兩臺以河夫積剩千金爲贖文堅却  
之且輸粟捐金賑荒周急曾無厭倦其高義又如此  
李鸞字廷儀成化己丑進士授南京刑科給事中正色  
立朝權貴斂迹時中官竊柄中外輒輒鸞抗疏奏彈竟  
爲所構謫判秦州量移知上海縣廬州通判皆任真推  
誠曾無幾微愠顏以內艱歸廳事僅容旋馬室人猶服布  
衣人多服其清節

張守約字伯操嘉靖丙戌進士授中書舍人歷兵科都

給事中請罷鎮守關人出閱延寧兵馬諸疏卓識宏議



中外避之已亥厲駕南巡行在數有論奏搏擊權豪無所迴避遂爲郭勛構陷歸

劉大實字子虛嘉靖戊戌進士授高平知縣擢吏部主事遷文選郎拔幽滯抑奔競銓政一清時趙文華怙勢欲由銀臺拜少司馬大實薄其爲人卒不以分宜故私之尋遷太僕寺少卿綜覈馬政奏劾趙愷等置之法諸廢漸起進順天尹戶部右侍郎竟爲忌者所擠罷歸家居二十載不蓄姬妾田產所入悉以贍姻族及鄉里之貧者年七十二卒有司以聞賜祭葬子渾成竟成渾成字義軒嘉靖乙丑進士歷官工科給事中出爲浙江左布政有治績居鄉謙讓溫和僕役畏其嚴慎竟成字尚

汝寧府志卷十一  
軒隆慶戊辰進士授內黃知縣歷官大同知府致仕歸  
鄉人服其德舉爲飲賓

陳耀文字晦伯生而穎異日記數千言鄉里號爲神童  
中嘉靖庚戌進士授中書舍人選工科給事中數上危  
言忤時相意謫魏縣丞量移淮安推官寧波蘓州二府  
同知遷南京戶部郎中後出爲淮揚兵備副使淮揚多  
盜其里中豪恣爲姦利耀文悉擒治之尋陞陝西行太  
僕寺卿遂請告歸有指揮饋以造船餘金麾而却之抵  
家日事著述年八十二卒所著有天中記正楊學林就  
正學圃萱蕪經典稽疑花草粹編諸書

劉政母陳病校荷湯藥夙夜弗懈及卒結廬墓側負土

築墳無何父瑾病政自墓所歸泣禱於天願以身代父  
尋卒復廬墓側寢處苦塊時大旱惟政處方六七里雨  
澤獨徧人以爲孝感焉成化五年有司以狀聞詔旌其  
門從孫劉鵬終有至性操行甚高事父母備極色養與  
兩弟同居怡怡如也母病衣不解帶焚香籲禱母方在  
昏夢中恍有告者曰汝有孝子汝病至某日而愈已而  
果然正德六年有流寇之變鵬負病母攜弟侍父走避  
山谷間跋涉險阻手足潰裂賊入城大肆焚劫至鵬家  
見一老嫗問主人何在嫗以孝子負母入山對又睹其  
門有孝子劉政坊乃叱其徒曰此世孝之家也勿犯故  
其舍巋然獨存後父母相繼歿鵬哀毀骨立葬祭盡禮

萬歷丁丑卒知縣東萊率僚屬躬往奠之方侍御奏其事詔旌其門

劉謹字克勤正統辛酉歲大饑僅輸粟二千二百石賑濟有司以聞奉詔勞以羊酒旌其門爲義門

安如嵩領萬歷己酉鄉薦署考城教諭造進後學培養風氣陞陝西真寧知縣當子午嶺衝途寇服其政不敢犯初蒞任以地荒人殘力請停征撫院具奏允部院題疏薦邊才陞鞏昌府同知代署階州甫三日大寇蝟子塊數萬突至州城池淺惡督守力竭死之巡按周以敬題請卹典領變亂止

劉璧崇貞壬午以恩貢任湖廣岳州通判闖寇亂委璧

監軍同叅將黃朝宣賈威等破賊于洞庭湖屢捷陞漢  
陽知府未之任賊張獻忠攻岳州各官逃散惟璧與巡  
按劉熙祚堅拒三月糧盡城陷被執挾至長沙逼降不  
屈嚴刑酷逼至死罵不絕口子泰時年十四亦死焉巡  
按黃澍以其事上聞會寇亂不報

郭鄭字山公初任華州廉明仁恕治化推爲第一百姓  
戶祝之繼以漢中屯田授知臨清州事士民愛戴一如  
治華年七十卒子如麟入籍陝西任興國州學正孫孝  
思蕪湖知縣

### 國朝

劉亮工字熙載孝子鷓元孫順治戊子拔貢授湖廣德

安糧捕通判時洪內閣承疇經畧湖南徵亮工督運糧  
草軍需賴以不匱陞廣東高州海防同知時署府篆有  
總兵妾父恃勢害民人人切齒被害者控于巡按委府  
勘問亮工曰爲民除害不可遲遲則有變遂繫于獄民  
皆鼓舞稱快石城縣教官藍某有張秀才借銀二百兩  
後藍罷官屢索不還遂勾引大盜殺之行劫時藍于某  
潛藏闇處見張亦在其中後控于官受張賄事隨寢藍  
子復控于督撫委知府蕭嘉熙刑廳呂某及亮工鞠之各  
餽以千金亮工卻不受竟置于法因是與蕭成陟秩滿  
陞福建興化知府蕭譏于上臺使未任罷歸

明吳文紳成化間人天性至孝母楊遭疾文紳朝暮侍湯藥及卒結廬墓側林中枯木復生鄉人異之爲立石記其事

樂壽諸生好禮有行孝事其親正德六年流寇至縣殺掠甚慘鄉人皆走避壽因父老病不能行獨守勿舍賊感孝皆釋之

李經字文樞中正德甲戌科進士初授吳縣尹精敏勤恪慮戶部主事員外郎中以功績茂隆擢西安太守下車卽問民疾苦尤屬意於學校關中豪傑多所拔擢相繼登科第者率多門下士尋陞本省副使叅政

周志德爲邑諸生崇貞末土寇蜂起志德同父重光及

弟懋德之德倡率一鄉義勇禦之賊首王舟率衆來攻其父及兩弟俱爲賊所殺志德負重傷得不死越三月楊督師駐汝寧王舟就撫受職志德懷刃乘間親戮舟於督師轅門甘以身伏法督師感其父子忠節宥而旌之



汝寧府志卷十九

人物

新蔡縣

明曹鳳字鳴岐春先一日母自外歸見火光如輪當其前  
明日鳳生生而靈異書過目輒成誦成化辛丑登進上  
授祔門知縣六年擢監察御史宏治初鳳持風裁崇論  
正議多所嘉納偶奏事失儀鴻臚糾舉上特宥之曰此  
曹御史也好官當畧其細過五年巡按江北頴上僉事  
某敖虐不戢劾罷之一路肅然以抗直不容出守蘓州  
尋陞山西左叅政湖廣右布政擢都察院副都御史巡  
撫延綏正德初召還京師逆瑾方用事賄賂公行諸部

院見者多長跽鳳故不見及見又長揖不拜亦無所贈  
逆瑾不喜乃問曰都御史知回院故耶鳳曰聖恩也瑾  
曰何以報稱鳳曰振肅紀綱激揚淑慝耳瑾怒目攝鳳  
出鳳卽上疏乞休不報再疏亦不報時瑾嚴勘天下錢  
穀以中傷不附己者勘官希瑾意言延綏布糧汜爛過  
緣主者鳳適丁外艱所司奏鳳當守制瑾乃罷其官聽  
勘竟誣鳳償布五百疋粟千石鳳鬻產完報瑾怒猶未  
解也鳳一日無疾端坐而逝明年瑾誅朝廷憫其忠遣  
官諭祭仍給金營葬

戴璜字宗儀爲諸生正德七年流寇猝至璜與其子奎  
讀書城北一村壘中賊得之欲與謀以濟其亂璜不從

乃脅以刃璜瞋目眦賊賊怒裂之擄子奎入壘賊帥詢其故曰壯哉吾舉兵五載未嘗見此人何爲害之遂斬害璜者釋其子令葬璜其面如生

熊應周正德辛未流寇掠邑境應周隨父絃匿於村舍後賊至執絃索勒金帛絃無以應賊遂解絃衣反接其手舉刃將殺之時應周年方十六卽長跪哀告解衣裸體蔽翼其父求以身代賊大感動俱舍之有司以狀聞提學王遂令補縣學附生

張九一字助甫嘉靖癸丑進士授知黃梅縣以治最擢吏部驗封司主事時與李攀龍王世貞諸君結社談藝世貞謂吾黨有三甫其一卽助甫也會世貞父元美

失分宜相驩搏下詔獄九一數過存問坐是出爲南尚  
寶卿謫廣平丞稍遷湖廣按察僉事駐節岳陽景王歸  
葬所過巨璫要挾以千萬計九一給曰第行後當自辦  
延至蘄黃將出境維舟以待九一故令數百人夜舉火  
遠譟璫駭懼以爲盜也亟解纜去遷布政司叅議以憂  
歸於洪河之濱構綠波樓積書萬卷諷誦其中凡十年  
起補涼州陞副使備兵甘州尋以功陞都察院右僉都  
御史巡撫寧夏歲凶道殣彌望爲糴穀二萬五千石賑  
之又爲之開河渠建橋闢修河堰以備水旱廣招徠勸  
墾種立堡塞以儲軍實墾田一十四萬餘畝修興武諸  
城及他營壘數百里上數賜金帛旌勞會言者治江陵

事註誤坐劾歸歸而與同里閔汝用汝陽秦京輩爲大  
呂社執經問難賦詩言志時泛舟南塘觴咏娛樂卒年  
六十有六上追恤其勲勞特遣藩臣諭祭所著有綠波  
樓集朔方奏議子體震領萬厯戊子鄉薦能以文學世  
其家

曹亨字伯貞鳳孫母夢綠衣神人入室遂生亨嘉靖乙  
未進士授刑部主事亨素嗜法家言奸吏靡所措手貴  
戚請托紛至亨據法力爭務得其平出守兗州用嚴爲  
治奏績爲天下第一會有紅羅女者以妖術惑衆至數  
萬人謀爲不軌官吳真敢攫其鋒亨提兵往勦乘風縱  
火以萬弩射其後賊敗走至曹坡集驚曰追我者曹公

也而坡議近於破其不免矣賊既殲擢南副使時遼東  
人多不法然憚亨不敢大橫遷浙江叅政以外艱歸服  
闋當起念母老且病疏請終養日侍左右孝養備至及  
卒哀毀踰禮起補湖廣叅政尋陞副都御史巡撫真定  
適有邊警萬騎迫太原羽檄夜至亨卽擐甲策馬赴敵  
行風雪中大將軍後至訝亨勇倍於已亨毅然曰我年  
雖六十率十數壯士可當一面然我以死拒敵爾獨能  
自完耶乃相與奮擊大勝龍泉關下進兵部侍郎協理  
戎政營伍一新會上大閱賜亨緋魚服兼賜膳賜扇以  
寵異之尋陞南京工部尙書舊織造大璫歲冒水衡錢  
不貲亨奏劾之留中不報遂求去得致仕歸故廬敝裘

若未嘗貴顯者屢賜存問寵遇不替年八十有二忽一日方與客坐談有人告有大星殞亨謂客且飯吾欲小憇遂就枕而逝諭賜祭葬贈太子少保

王惟善字衷甫嘉靖丁未進士除潞城知縣政尙寬靜毫不苟取後鎮守江會有巨商爲仇所誣陷於重辟以十萬爲壽求白其寃惟善曰辨誣則可何以財汚我乃叱去尋備兵威茂每當互市恩威並加西羌誓服威望日著蜀王倚爲長城適吐番爲患惟善傳檄督兵三千一戰大破之羌氏遂平蜀王欲疏其功適以秋榜赴宴忽卒於宴上王哀之曰君死孰與定西羌哉遣官祭奠之

宋訓字汝式嘉靖己未進士初授知襄陽縣忠信化人  
嚴正律已課士尙實學教民樂本務擢開州守時開城  
傾圯訓下車卽申請督撫上疏請修得旨會某宦素橫  
居郭外乞廓城制而週其私第訓曰是役也吾上奉君  
命下竭民力毀古制而勞民傷財吾不敢也某復固請  
終不之許累晉通政少叅訓既登銀臺以紀綱自任正  
色立朝後以姦黨中傷調外任復厯官刑部郎所至皆  
有異政姦黨嫉訓益急訓笑曰辛毗不云乎孫劉輩不  
過使我不爲三公耳况可止則止去就之義吾素明乎  
乃托疾上疏乞休以原官回里勸農課子見二流東注

秋漲水常至城下乃捐數千金築長堤六七里許以障



冰勢一邑利賴之卒祀鄉賢

厲調美字汝用工詩文名與三甫七子相伯仲萬曆成  
進士授戶部主事提督清江浦革去病商弊政七十餘  
款諸商戴德遂擢守太原有晉王內戚違不法按律戍  
道之署七道篆有以督學經費千餘金獻者調美不納  
悉發之以賑荒以病歸里居三年起襄南道值妖賊聚  
衆數萬調美身冒矢石盡力殲滅之爲忌者所抑不得  
叙功遂乞骸歸日與秦東諸子飲酒賦詩著有熊耳山  
房詩卒祀鄉賢

劉大思字孝伯嘉靖間舉於鄉數困公車遂就銓人授  
知懷州治行稱最尋遷鞏昌府以母老上疏曰臣里去

酒泉七千里臣母去八旬僅三歲病不任輿又旦夕不  
忍離臣赴任必無母無母亦必無臣詔許終養乃構一  
樓以居母備極孝養暇則博採羣書纂輯邑乘蔡之有  
志自大恩始母喪哀毀成疾經年不愈忽逝去復甦其  
子颺請曰父有所見否大恩索筆書云鬼魅不親原有  
說只因正氣達蒼穹擲筆而逝

張洪字德寬天性孝友宏治癸丑母喪過哀廬於墓側  
衆勸之歸弗聽一時暴風雨卒至砂石飛揚空中若有  
物相擊者廬將崩洪危坐不動曰天不欲吾行孝吾死  
此耳終不忍去吾母風雨頓止又感白鳩之祥事聞詔

旌其門子什以鄉舉授松江通判陞無州府同知州

未幾致仕正德辛未霸寇攻新蔡城將陷衆請什決策  
什曰我老親在如城破安得獨存賊唯利是嗜或出金  
幣與之庶可解耳遂傾其家資踉蹌詣賊壘告曰縣小  
民貧不足以容車騎家有老親聞兵威輒至驚絕淚隨  
語下賊歎曰殊未見衝鋒抵死爲親者爲之歛兵去蔡  
頰以完卒之日無問親疎俱哭吊之旣葬鄉人於其墓  
旁立祠以祀

劉周南隆慶庚午舉人授靈璧縣令構一樓迎母居之  
且視飲食問起居畢後理簿書奏最稱循良第一直指  
凡五薦丁艱起復補光化令邑多積棍公至恐其滋蔓  
欲盡除之謀泄奸人陰中之去公在靈璧時曾爲一士

人辨其誣枉士聞公寃欲索奸人而甘心焉公力止之  
劉世燮新蔡人拔入雍授西安別駕以治行擢鳳翔知

府鳳翔當隴蜀孔道供應煩苦公勸耕桑給牛種恤災  
賑乏閭閻漸有起色年三十六解組歸子址庚戌進士  
曹守直諸生父沒養於伯父事二母視膳問寢數十年  
如一日或有疾必禱於神願以身代爲二母重費購爲  
木置棺藏秘室火起比屋延燒直呼籲天地叩頭流血  
遂反風火滅嫡母卒泣血不茹暈廣墓三年生母卒負  
土成墳亦廬墓三年年七十餘言及母輒泣然淚下知  
縣申報兩臺學憲郡守旌其門曰純孝

曹應仕字公通貢生秉性方正經明行修五赴秋闈不

售居家教子以修身積德爲本凡遇處困危者多方周濟利澤施諸人聲名昭於時知縣譚宏憲重其品詣敬禮之式廡題贈曰溫潤恬和

西平縣

明徐理洪武初從諸將定江左諸郡歷官至永清左衛指揮僉事調營州中護衛靖難兵將下大寧理從間道詣軍門請見遂從成祖戰於白溝河破雄縣滄州藁城定兩淮入京大小十餘戰皆賈勇先登所向克捷擢都督僉事壬午封武康伯賜白金文綺貂蟬官服還守北京寬厚馭下士樂爲用永樂六年薨子貞嗣貞薨子勇嗣勇無子

衡岳少應鄉試入太學洪武三十年詔國子監選諸生  
詣詹事府議事以岳所陳有裨時政擢潮州府同知約  
已惠民自常祿外毫無所取永樂間稍遷西安知府其  
清操善政如在潮時以內艱去服闋改慶陽永樂十年  
坐言事忤旨謫戍交趾慶陽西安二郡民千餘人詣闕  
請貸以終惠不報昭皇嗣位御史袁綖等交章薦岳起  
爲南城令尋改南豐常於官舍種蔬以自給家人或有  
愠岳曰不猶愈於謫戍時耶正統初擢桂林守致仕歸  
卒

毛祥正德己未進士授京山知縣陞岳州知府兩任咸  
以九年楚民復詣闕奏留三年遷雲南布政司叅政未

任卒岳州京山俱祀名宦祠子鳳鳴鳳來猶子鳳振鳳翔科第蟬聯不絕人以爲循良之報

楊舉生員正德六年霸寇陷城賊令生員有投降者待以優禮舉恥之昂然不屈賊拽而殺之

王誥字公遇嘉靖癸未進士授行人遷戶部郎中屬大同兵變擢廷臣有文武才者出守誥旣受命遂單車就道計擒首亂兩人餘悉相機撫定邊鎮以安紀功者疏其勞詔膾一子汝寧所世襲百戶陞山西副使整飭薊州尋擢僉都御史巡撫甘肅練士馬增城堡爲綢繆計敵兵入犯率兵擒斬首功百九十餘受白金文綺之賜累遷都察院右都御史總督漕運兼撫淮南地方時值

倭蠻猖獗內外戒嚴隨疏請旗牌節制兵馬諸將川命  
江淮以寧捷聞上復賜金幣獎勞忽感疾卒上震悼賜  
祭葬如例所著有河西稿淮南奏議東隅集等書

尹冕父聰官叅政冕補諸生性至孝母劉卒冕悲號幾  
絕廬於墓側朝夕哭奠形容枯槁墓傍產紫芝十六莖  
墓前雙柳交榦而生人以爲純孝所感父歿復廬墓三  
年成化十二年九月詔表其門

張文佐字良弼成化甲辰進士累官山東叅政父淵遭  
疾佐籲天祈代疾遂愈後父卒佐徒跣哀號旣絕復甦  
及葬廬於墓側手植松柏千株以哀勞感疾夜夢人賜  
以藥方因如其方服之卽愈後居母喪亦廬墓三年左



產靈芝三本也赤如鷄冠事聞詔旌其門

于宣成化甲辰進士歷官兵科都給事剛直敢言中外震懼時宦寺馮某擅權舉朝無敢議者宣數陳其過端上不聽馮乃託禮部侍郎王瓊曰于公與先生同年肯與吾交富貴可保王因與宣言曰若與馮宣交諸事便宜公曰一飲一啄皆小民膏脂無功與朝廷食之有愧若馮某者吾恨不能食肉而寢皮顧可與交也王悚然不敢復言次日論奏王瓊不稱職黜之馮愈恨詞宣過然素無可嘗者未幾以疾歸里及馮敗朝廷始知宣之忠欲大用之會病卒祀鄉賢

徐文英字彙華成化丁未進士歷官陝西苑馬寺少卿

正德辛未流寇陷西平文英死之事聞贈太僕寺卿同  
時與難者生員徐固輪戚壽義官賈得山等七十四人  
俱從祀忠節祠

陳紳爲諸生素以忠義大節自期不苟然諾正德六年  
流寇攻城率闔學諸生詣縣官王佐陳大義誓以死守  
及城陷王佐死之紳猶率衆巷戰以衆寡不敵戰死事  
聞詔立祠王佐紳從祀焉

王讓字蒙宇舉人學問淵博行誼端方爲白河縣知縣  
性慈祥刑人如疾痛之在身寮屬有以過慈非政所宜  
尚者公卽解組歸以訓誨後學爲事所著有王子集翰

郭五常字大經正德辛未進士授大理寺評事武宗南幸上書切諫罰跪門五日杖之八十謫通政司知事嘉靖初復原職恤刑陝西多所平反陞萊州知府廉介自持萊人繪祀楊震祠中起補鄖陽鄖人爲立甘棠碑累陞山西行太僕寺卿修舉馬政屢奏邊功以入覲卒於京邸

張應軾字蜀溪天性醇篤孝友博聞以濂洛諸子自期執經問字者百餘人出其門者步履端方望而知爲門下士由明經訓黃岡論教蒲圻岳州其興起率多名儒所著有四書翼註歷代忠臣錄見聞紀畧數十卷

楊士英以恩貢任山西懷仁知縣居官廉能母老乞歸

終養崇貞九年流寇抵邑東鄉恣焚掠英被執不屈賊令其順已則不殺英大罵賊怒殺之媳王氏亦痛詈賊并殺之兩院旌表其事

魏芳爲人有智畧崇貞癸酉流寇渡河南侵將近西境芳率鄉人謀截殺之與衆誓曰我輩勿懼但買勇奮登賊未必不死我手獨不聞一夫舍命萬軍難當况有大兵尾其後我輩卽不勝兵主賊必奔矣賊至儀封店芳率衆迎之禦殺一二後賊益衆芳死拒衆潰身被數鎗而仆賊退子孫輿昇至縣未絕猶聲言殺賊云

徐惟性性至孝母病性割股奉母病旋愈越二年母死

哀毀骨立及葬命弟惟孝養其父已則廬於墓側鄰

史及巡道沈俱微行至其廬與之語歎曰徐惟性容止  
朴野斷非文飾可得因給以金使養父廬止四木相倚  
上覆草數束冬大雪埋其廬寒暑交侵迄無恙後直指  
王檄縣官給墳地二畝免其賦役名曰孝友莊

宋自勉性醇樸勤耕植家裕而好義明萬厯二十一年  
歲大凶民多饑死自勉請縣官願蠲糧五百石縣官旌  
之以吏員歷紫陽五臺典史克盡其職年九十八卒

王之棟邑庠生也素方正自持崇貞十五年城陷棟詣  
明倫堂偕妻默坐賊縛之棟大言不屈與妻同死

吳靜以貢仕曲阜削道年老歸一日遇寇氣度偉如不  
少貶損持鎗刺之大罵不絕而死

夏名文邑庠生崇貞十五年流寇陷城執文問縣令所  
在文不以告賊怒殺之時殉難者又有生員劉東井柳  
應星劉出奇杜子權張所定任希孔劉漢英戴君恩任  
希尹胡和春陳廉郭世勲陳克讓耿拱樞楊煌吳鍾靈  
等三十人

楊積石邑庠生崇貞壬午以父煌死流寇難因從死創  
其妻衛氏亦自縊僕范進寶亦殉主而死

趙鑑儀封鎮人性勤稼穡急公好義歲大稔鑑自請于  
官蠲穀四百石煮粥賑濟全活甚多又建社學于鎮每  
年蠲貲二十金延明師以教民間之俊秀者子鳳騰鳳

陽選貢生

宋繼顏自勉子襄陽稅課大使萬曆三十三年六月山西商人賈自明于劉家橋沙水失銀六百欲投水死顏見之卽命漁人網出還之

張伯楠性嗜學篤于孝友兄伯梅卒遺孤獅斗二歲撫育成人及分產讓其尤者又長兄伯松子大化殤遺孤定孤十有二歲爲繼母所苦楠爲之分析各定其居歲饑人相食楠輸穀賑粥民賴以生活又施義塚三畝

朱光榮諸生崇貞十三年流寇過專探店有寧陵縣女張氏被掠年少有姿色鄉勇周秉新得之欲收爲妾氏堅不從榮捐十金贖之送回原籍

趙鏞幼好學數竒不售躬耕田野見人急難不惜捐貲

急公輸義與塾延師以教貧士之不能讀書者疫氣盛行鄉人闔門坐斃鑊善醫藥煮藥施舍愈者甚衆并置辟瘟藥于井中

劉學詩樂善好施歲荒輒以錢穀周親黨遇互寒給絮于貧者又施義地三畝以葬民之死無地者

宋光灼諸生崇貞十三年饑民間易子而食西華生員張宏聲携妻及女飄流西邑灼為解衣推食衣食之及宏聲死寇難灼送其妻女回鄉井時共義之

遂平縣

明趙希哲邑人洪武四年選舉孝廉授浙江嘉興府知府

時浙中未盡歸化公單騎馳諭下數郡因著稱廉能永



樂中崇祀鄉賢

遠志漢武五年由兵部司務陞陝西道御史陞大理寺丞尋陞僉都建言被謫陞戶部主事員外調永州府同知陞應天府丞致仕

張來儀正德初爲四川羅江縣知縣以廉能稱會蜀寇青頭保爲亂司府檄來儀於劍州禦之兵敗被執令儀跪儀誓不絕口遂被害祀鄉賢祠

陳俊貢生官太原同知親歿廬墓三年祀鄉賢

張守正母卒泣血廬墓三年有老翁相伴不去問之曰農夫也及歸辭去曰我本村土神帝感汝孝命相伴耳李斌生平負大節有奇氣正德間流寇爲亂公督鄉人

與戰被執責以義大罵賊怒剛之祀鄉賢

越效忠少負俠氣負擔入山遇異人授以仙術比沉疴不起者以手摩之卽愈王公大人折節者甚衆且勇畧知兵手能碎石天啟朝授遊擊鎮清華流寇掩至援兵不繼力戰不屈死之

郭奇字方策鎮守邵武府副總兵有山寇竊發宋大庵等分掠隣境圍搶將羅縣奇聞信星夜馳至掩襲山險馬仆傷腿猶披甲胄追賊城賴以安時以脛傷病卒閩人哀之

周明周德明木亂妹有姿色士兵包明軒奪之不獲殺其父明兄弟逃去其後卒執明軒殺之兄弟赴官爭償



持所食之食跪進母食則喜而起舞不食則泣兒者莫  
不與歎邑侯張公嘉其純篤因心獎以孝子匾死祀忠  
孝節義祠邑先達有榮節者亦祀祠內舊志無傳郡志  
僅稱其官青州太守居鄉能以財通人假貸有不償者  
焚其券云

陳林家貧自食其力節所有常以施茶暇則收埋道路  
遺骸見有神廟傾圮者爲竭力倡募修理食苦行善殆  
不易得縣官匾旌其門

### 國朝

賈習儒明丙子舉人賈存心之父也性行醇篤樂舉善  
事文廟經兵燬後習儒拆其家廳事材料捐修大成殿

施銀三百餘修兩河橋平生施襖施棺畧無倦色人德之咸稱封君而不名子存心名列賢書運丁未季乃自號白蘇放浪江湖寄情詩酒終焉

魏治民性孝友幼喪母家貧有弟愛民方提携治民茹苦撫育及成立有室生子卒不析產里人咸誦其義

李可教平生敦尚孝友痛弟早喪撫遺孤若梓必教之成立若梓有過則撻已子芳春以警之邑人義之歿後舉祀忠義祠若梓亦能仰體教思力學勵行舉順治辛卯孝廉不仕行義於鄉與芳春同居共爨友恭兼盡平居常誡子弟曰行事當以聖賢爲法始無悔事立心必求鬼神可鑒始無愧心故芳春若梓之子若孫林立於

仕籍鬻宮俱能讀書循禮世其家云

趙焯孝弟力田進士趙之珩之父

王永寧明於岐黃任邑醫官投餌多効不計利生平樂善好施凡婚喪不給及患難窘迫者輒捐資濟之更創修石橋二座以濟利涉邑侯嘉其德義三舉鄉飲大賓薛掄元增生父歿廬於墓側思父則泣血淚染衿後舉約正以忍讓守分四大字教人里有兄弟爭產者兄將移居適至約所見掄元以忍讓守分字啟給鄉里詳細解說卽驅車回家與弟友愛如初掄元又道拾遺金一囊俟其人來還之鄉人負其財願納女掄元堅却不受

立焚其贖券不令賞乾隆二年以孝行旌

張振元貢生官商邱訓導端謹自好士也齒德文行推  
重鄉閭乾隆七年冬舉鄉飲大賓祖其素父璣俱與鄉  
飲

李法貢生歷任登封淇縣教諭所之振興文教克稱厥  
職在登封重修嵩山書院諸生膏火不給捐貲贍之子  
玉佩以長厚承先志嘗出值十餘金買一婢後知其翁  
賣媳也立呼翁偕其子來令携去完聚焚券不取值

李濟貢生弟淇早喪力撫遺孤迄於成立康熙四十二  
年歲饑大疫出家粟煮粥賑其鄉里死者悉給一棺施  
地十餘畝爲義塚埋之

王忱貢生家素饒裕好義樂施鄉里以善人名之乾隆

已未以德望舉鄉賓

魏如瑄貢生官洛陽訓導教諸生以敦本黜華去佻崇雅居鄉亦以長厚稱乾隆癸亥舉鄉飲賓

魏聖倫精岐黃始以醫藥濟人家爲窘後遂稍聽人投值以佐施藥費卒不計利樂善之誠老無倦色

王元學字冠儒少孤事母以孝聞撫弱弟成立爲人平正通達解紛排難里黨賴之畏壬子舉人

趙繩祖少孤有至性事繼祖母繼母以孝稱母喪廬墓二年終身不衣綵色設義塾以教里黨尤好行善事子持三武舉人

王心坦幼喪父依寡嫂以長事嫂如母里黨中排難解



紛周急貧乏

柴重子子厚孝友醇謹志行端方里人稱之

信陽州

明孫顯洪武丁卯領鄉舉肄業國子監太祖臨幸說書稱  
旨授工科給事中累陞工部尙書丁外艱廬墓三載鄉  
里推重之上嘗御闕樓睹欄楯上有紅光閃爍令人跡

之則顯衣緋袍以督役也由此忌之會廷諍忤旨杖四  
十謫戍雲南密籍其家止奉牛一頭茅屋數間使者還  
報上嘉歎召復原職至中途卒復賜八十金勅有司營  
葬事

王綱永樂間歲貢母患疾晝夜侍側躬嘗湯藥母卒哀

毀不食廬於墓側雖盛寒徒跣負土營墓時值大旱境內田禾將稿惟綱所居周圍十餘里霖雨及時鄉隣異之事聞詔旌其門

葉清字源潔宣德丁未進士為監察御史平允持正陞山西僉事景泰庚午賊八犯以清總偏頭關事時兵少賊強清募敢死士萬餘人與都督杜忠議曰朝廷厚養爾輩正為今日予本書生願與國報忠率驍騎於前清統勁卒於後與賊戰大破之捷聞陞叅議尋轉副使

高鑑字克明成化戊戌登進士為武選司主事崇王既之國汝寧請置守備大司馬謂信陽已置守備難其事鑑曰是無難也即移信陽於汝寧俾兩備之便遂著為

令尋以事忤中貴人遂謫鎮遠通判適洞蕤相讐殺督  
府檄鑑往輯之不服鑑乃直徙居他山供帳如故近明  
則臥榻已椎碎矣鑑從容束帶出帳中議事羣疑望而  
神之皆叩首伏遷鎮江同知夔州知府甫一載歸鑑體  
貌修偉才器磊落善談辨曉音律詩書圖畫自成一家  
云

何景明字仲默八歲能詩以神童稱父信爲臨洮驛丞  
景明隨侍臨洮守李紀奇其才授以春秋卽善說春秋  
歸復受尙書於兄景韶以尙書舉宏治戊午鄉試第三  
時年方十五諸王公大人爭迎致一見候車日數十乘  
所過觀者如堵壬戌成進士授中書舍人與李夢陽邊

貢薛蕙輩工古文辭尙氣節鄙榮利並有國士風海內  
操觚之士皆宗尙之稱曰何李時逆瑾用事景昉移書  
許襄毅公言大臣宜操正議以抑瑾權瑾聞而銜之景  
明乃謝病歸後竟坐免官正德四年瑾誅大學士李文  
正公疏薦復職直內閣制勅房經筵官及夢陽遭江西  
之訟又移書楊太宰一清爭之始得解九年乾清官災  
景明應詔陳時政詆義子宦官語多激切不報是時四  
方學士咸願識景明錢寧亦欲交驩持古畫求題終歲  
卒不予一字師御史客死京邸權倖廖鵬者贈以棺景  
明叱却之曰吾友生不苟受豈以死污之哉遂自出金  
賻之十二年進吏部驗封司員外郎仍直內閣明年遷

陝西提學副使以經術世務教諸士規約尙嚴志在崇本除弊自是士習文體爲之一變十六年病歸卒於家年三十有九景明於學無所不窺而大才俊逸不事雕飾自臻麗則所著有雍大記三十卷何子十二卷詩樂府書疏騷賦序記銘贊雜文二十六卷自切謙退未嘗以才凌人及論國家事則侃侃而言有萬人獨往之氣道弗合者雖顯貴拒不與見至道藝士卽貧賤衰老尤折節下之生平不問家產居喪不飲酒不聽絲竹嘗使滇南不持一物歸攷其行誼固蔚然醇儒不獨以文章名世而已子立孫洛文另傳洛書官檢討

何景暘字仲升景明兄官安慶通判時宸濠犯安慶景

賜領兵捍禦勞績頗著賜軍書褒賞陞右軍都督府經歷進階光祿少卿

孟洋字望之宏治乙丑進士授行人選爲御史卽疏劾大學士梁儲斬貴上怒下詔獄謫桂林儒學教授稍選汶上知縣嘉興同知陞湖廣按察僉事持憲專斷不肯阿人意稍有拂卽日引疾去嘉靖初起山東僉事轉陝西叅政擢都察院右僉都御史巡撫寧夏尋改提督糧儲聞母病卽解綬還或以職守難之洋曰吾方寸亂矣尙能顧其他哉抵家甫月餘而母歿服闋拜南京大理寺卿才至五十日卒貧無以殮僚友醵金購之妻何爲仲默女兄洋爲行人時與仲默崔子鍾田勤甫輩楊樵

風雅稱十才子著有涯集十七卷

何立字豫甫景明子七齡失怙恃苦志好修才華氣節  
紹先起後性嚴正中嘉靖癸卯鄉試授懷遠知縣縣校  
苦田賦諸軍餉糧馬驛傳督責旁午民逃地荒立爲蠹  
縮輕重調劑緩急俾富無滯財貧紓系息清訟平罰下  
感上孚府役不輕下縣避罪者不敢匿陵戶所盜發卽  
擒水陸毫不爲梗贍事展物賓至如歸廣招徠業人予  
牛種三年乃徵其賦引宿逋者有禁人來告著故土者  
日以數十百計月試諸生崇獎節義孝悌擢德安同知  
署雲南慶隨州俱著賢聲

馮鑄字大京成化戊戌進士初授刑部主事歷陞湖廣

兵備平郴桂諸處洞苗上嘉其功賜豸繡二襲白金二錠巡撫畿南值逆瑾擅權諷鎬附已鎬曰司官可奪此節不可喪遂解綬歸出賜金置義田贍貧族置祭田備蒸嘗都御史唐順之撰碑記其事

張雲字季升宏治壬戌進士授襄陵知縣擢禮科給事中時逆瑾方擅權雲抗論其不法者數事下獄幾死瑾敗得白武宗南狩雲率眾伏闕泣諫上大怒以疏辭忠懇不罪累遷太常少卿光祿卿都察院副都御史巡撫遼東

馬錄字君卿正德戊辰進士授固安知縣初至延父老問疾苦廉明惇信士民悅版圖中有冀寇襲破固安羅



見臥內無長物知其賢弗敢犯獨縱令獄囚去囚曰  
輩罪宜死幸無竄以累吾慈父復相率詣獄徵拜監察  
御史嘉靖初遣使捕高唐官屬連坐五百餘人中外大  
駭錄上疏諫曰先帝時動差錦衣官校四出提人天下  
沟沟幾壞國事幸賴陛下登極祛除害弊人始安堵不  
意復有高唐之命人情且驚且疑當此新政之初恐非  
所宜癸未巡按陝西汚吏聞風遁去辦冤振滯關內大  
治旋以疾家居時信陽苦河夫之役歲倍納銀重爲民  
累特奏免之及巡按山西妖人李福達事覺錄捕抵法  
初福達以丹術干武定侯郭勛勛竒之相與頗密又被  
繫勛移書請質錄大怒劾勛庇奸亂法勛惶懼入辯謂

錄置一家無罪人於死上震怒逮錄下錦衣獄且廷鞫  
錄被三木但曰臣殺妖人爲宗社計陛下明並日月察  
臣孤忠臣死無憾上疑以屬三法司於是刑部尙書顏  
頤壽都御史劉文莊大理卿湯沐等會鞫如錄擬給事  
中工科等御史高世魁等二十五人各又奏論勛先後  
十餘疏上令於午門外更訊頤壽仍執前詞上曰候朕  
親鞫於廷場一清以黼扆不親獄訟乃已仍會訊之頤  
壽等改擬福達造妖言律上怒乃命兵部左侍郎張璠  
攝都察院禮部右侍郎桂萼攝刑部少詹事方獻夫攝  
大理寺訊於闕廷萼等私議曰聖明偶爲近習蔽不急  
救致有殺直臣名乃委曲具奏而輔臣有爲錄地者從

容曰馬錄罪大當誅腐儒狗名一死未足爲快不若按諸遠瘴於是錄與李璋徐文華劉琦程啟克盧瓊李珏章綸等坐故人罪俱謫戍頤壽文莊沐與侍郎劉玉等坐推按不實俱落職王科與聶賢秦佑等坐挾私彈劾俱爲編氓福達釋歸勛置不問錄旣戍南丹講學授徒從之者如雲歷十七年以疾終年六十有八穆宗登極追贈光祿寺少卿

芮嘉元信陽衛指揮使萬厯末山東滕縣白蓮教賊亂聚衆數萬隣省震驚督府檄調嘉元往征之每戰必衝鋒賊辟易無敢當者戰歸甲馬盡血斬獲倍於諸將一口以單騎陷陣死事聞詔褒贈焉

李呈章字順卿性孝友祖遺財產盡讓諸侄萬曆丙午  
舉於鄉授河內廣文陞山西遼州守崇貞間流寇倡亂  
時承平人人不知兵方修築城垣禦寇寇乘夜襲破之呈  
章坐堂上罵賊不屈遂遇害

戴冠字仲鵬正德戊辰進士授戶部主事時誅逆瑾沒  
其財產貯之豹房而錦衣官屬監局匠役皆坐食糜費  
宣大陝西邊餉數告急冠上疏言之上怒謫廣東烏石  
驛丞舟行值海賊擊冠墮水舟子提其髮出之賊復揮  
刃冠髮長倍身止斷其髮得不死逐波流去若有人捧  
足而出之者三久乃獲濟先是冠父長史誼涉江夜聞  
水中羣鬼哭若求援者次日令人探深潭得枯骼無數

徙瘞高原復夢前鬼致謝曰終當有以報也至是人皆以爲冥報云居嶺表凡七年起潛山知縣適嘉靖改元憫其忠諫復戶部員外郎陞延平知府改蘓州陞山東按察副使未任丁外艱歸服除起補陝西未逾月以病歸冠丰姿瀟洒含默寡言平生喜聚書嘗與王守仁李夢陽及同里何景明馬錄樊鵬爲詩文氣節之交著有邃谷集十二卷

樊鵬字少南嘉靖丙戌進士授安州知州多惠政遷南京戶部員外郎轉工部郎中疏請終養不許尋陞陝西按察僉事備兵固原邊有功受白金彩幣之賜以母憂歸服闋卒於家無嗣獨所著樊氏集十二卷傳於世鵬

嘗游何仲默邊庭實之門而與孟望之唐應德輩爲詩  
文友故其談詩卓有所見

何洛文字啟圖嘉靖辛酉鄉薦第一乙丑進士改庶吉  
士每試館閣輒冠曹耦已巳授編修壬申以上出閣講  
學賜宴文華殿尋緣上登極恩擢修撰充經筵日講官  
歷中允諭德侍讀學士掌院事詹事府少詹事禮部左  
侍郎每入講必先齋沐期以精誠悟主旁引曲喻用規  
時政及授簡詠古圖畫上未嘗不稱善乃大書責難陳  
善四字賜之與修兩朝實錄起居注大明會典辛巳以  
省親歸會江陵事起爲言者波及詔予休致甲午中州  
大祲文素以清介稱家無餘財乃鬻產賑饑全活萬衆

詔旌其門具疏辭免仍賜金幣所著賦頌詩文二十卷  
子奕家工古文詞敦行誼時有寢邱大猾觀察使劉繫  
治之謂奕家曰使彼以千金易公一言貰其罪奕家卒  
堅辭不受著有竹如草六卷及平靖關議

王祖嫡字允昌父詔信陽衛指揮僉事以他誥誤具獄  
奪世爵祖嫡幼警敏殊常兒稍長日誦數千言能賦詩  
年二十八舉於鄉走闕下上書白父寃得復其爵隆慶  
辛未舉進士改庶吉士呂文簡公嚴重之謂有忠孝大  
節諸吉士嘗毆詈吏部掾掾走愬於郎往白江陵下手  
劄將議調黜諸吉士皆匿祖嫡獨前奮言詈部掾安所  
坐罪事尋解癸酉授檢討壬午以內艱歸廬居墓側服

闕起補尋遷國子司業上疏言革除間事請及時釐正  
得旨許重錄景皇帝事而建文君事姑止時論避之明  
年遷司經局洗馬兼翰林院修撰纂修玉牒嘗撰明因  
寺碑中有塗膏斲血語微以寓諷偶達慈寧宮賜以寶  
鑑文綺佛像藥物及諸珍饌尋擢右春坊右庶子兼翰  
林院侍讀遂請告歸歸二歲卒祖嫡詩文博雅瑰麗卓  
然名家晚逃於禪比屬續神氣翛然不異平日子延世  
京營叅將善馳射工古文辭文武世其家

張四知字子畏登嘉靖庚戌進士授刑部主事尋調駕  
部郎時傳符闌出干者如蝟四知一切拒絕卽大司馬  
有所縱舍爲貴勢人地亦不少假居亡何出爲四川按



察僉事憲體嚴重墨吏憚其丰來諸所懲汰尤峻川東  
故有夏禹坊會撫蜀者阿寵臣陸炳意爲樹陸宣公坊  
視禹坊高大過之四知曰宣公卽名臣功高神禹耶故  
縮其制撫蜀者大慚恚欲有所中而四知以母病上書  
不待報歸明年撫蜀者竟劾罷四知官旣罷官所居環  
堵蕭然戒門者毋通賓客日坐一室惟以著述自娛著  
有韶亭書集中州考崇古韵證漢東都考周易辨疑四  
書釋義若干卷子宿次萬厯丁酉舉於鄉

趙謨家貧力學補博士弟子員馬御史錄其妹夫也以  
事謫戍南丹衛謨父文華往省之沒於南丹謨走六千  
里徒步扶輓歸形神俱瘁旣葬結廬墓所蝗不入境盜

賊相戒不敢犯終制上書郡學願削諸生籍躬耕養母  
州守唐瑤詣墓勸歸以其事聞詔賜表揚亡何居母喪哀  
毀逾禮後以歲貢爲景州訓導

蔡玠字錫卿年十六爲州學生母梁偶邁疾醫藥罔效  
玠焚香祝天割股食母母疾旋愈後母卒兩事繼母皆  
以孝聞領嘉靖戊午鄉薦因父老病絕意計偕父卒始  
謁選授淮安通判丙子調揚州丁丑陞淮安同知皆有  
治河功當事交章薦之上賜金幣嘉賚者三己卯冬引  
疾致政加授長蘆鹽運同知歸年八十一卒

張士傑寇至欲殺其父士傑以身求代賊遂殺士傑貸  
其父時年十八聞者皆爲流涕

劉永利字義之別號珂冷尙朴之少子有雋才性至孝而介辛巳寇陷州城永利縋母王氏下城母損足利負行至河干力已竭而寇且至母欲溺河死令子得逃因赴水利急抱母出復負之行哀號感動行路諸避難者爭爲負母因得生歲荒人相食利鬻書籍衣物市米奉母同妻孥掘薇蕨以食不一詣富室之門仲兄亡事嫂甚恭撫嫁侄女讀書手不釋卷詩歌爾雅有祖父風旁通釋典時爲方外之遊年三十六卒

董威字重夫食貧攻苦年四十一始第進士知魏縣入爲浙江道御史修京都重城巡鹽兩浙奏寬沿海厲禁按貴竹調停安宣撫有功任大理民號不寃撫直定筵

漢寧府志卷十九  
三  
綏招降千六百餘名復總督川湖雲貴平叛苗韓甸等  
三十六處詳在平苗軍功錄

王納言字維允嘉靖己丑進士授戶科給事中言時事  
得失直聲大振時考選太常寺卿上以金斌仁張鄂等  
任教習雅樂讀祝禮納言上疏太常古之秩宗所以典  
神祇和上下清華重地不可厠以匪人斌仁輩本道家  
奴耳異端黃冠豈可曳組鳴玉以汚廟堂上怒繫獄謫  
湖廣布政司照磨量移嘉興通判後分巡延綏未幾罷  
歸屏跡賢首山以吟咏自娛年七十五卒

王延世字思延號喬峯祖嫡子年十八以世職襲指揮  
使十九中本省武舉第二名本衛掌印陞嵩縣守備時

陸渾山中有毛胡盧三姓倡亂延世率兵勦之躬詣賊巢置金錢於百步外貫弓報矢呼賊渠曰若能中此則任爾肆掠不則速解散賊愕視莫敢動延世一發貫錢賊遂稽顙乞命陸渾平轉遼左寧遠侯李成梁幕下叅謀時有蘊入害者慄悍爲邊患延世於陣次一箭殲之一日忽失延世所在上下惶眙越三日則以三首功單騎歸蓋出塞深入也陞京營神樞佐擊將軍轉神幾營以扈驛功賜麟服陞京城內外巡捕左叅將年未三十乞歸家居詩文自娛時閉戶誦佛經不問外事崇貞元年恩詔進階二品鎮國將軍癸酉信陽中寇患延世贊勦守禦保全之功居多卒祀賢祠著華黍堂集二十卷

劉尙樸字太卿號生白弱冠中萬厯辛卯鄉試乙未與  
兄尙質同以進士起家授太原府推官風裁凜然陞武  
選司主事轉正郎疏壅滯清冒濫諸所條奏咸勒石司  
前永爲龜鑑有貴戚錦衣某者求掌團營爲曹邱遍權  
貴持益堅雖風以中宮意指不動也陞固原兵備道飭  
勵將士劾忒邊防以母老乞終養再以邊材薦不起卒

### 祀鄉賢

錢守廉字陸石天啟乙丑成進士初授太常博士選御  
史巡按廣東彈劾貪墨吏風裁凜然粵俗奸民多取富  
室子匿之勒索金貲贖其欲始釋歸守廉以舊法太輕  
上疏謂宜如東北響馬例獲者誅無時報可定爲律劾

贖之風遂息海上多警閩粵騷動設法勦禦招其渠魁  
海氛以寧後黎人煽亂守廉奏合粵西南賴諸兵削平  
之復慮地曠山險易以藪奸奏建連平州鎮平縣二城  
控制之修建之費數十萬金咸出自蠲俸勸募不費公  
帑事竣歸適中州寇亂會勦諸將驕蹇多縱兵擄掠守  
廉道值載婦女以行者問知爲某某兩大帥部也立疏  
劾之兩帥俱奉嚴旨責斥於是軍士稍戢再巡陝西內  
捍賊氛外飭邊防焦勞成疾遂嘔血卒於官年四十九  
上聞其忠勤加贈太僕寺正卿祀鄉賢

黃文煥字幼明別號十藪十歲以文見賞於汝南郡守  
林公年二十五領萬厯己酉鄉薦亞魁數赴春官不第

益肆力於古文詞爲詩藻艷不乏氣勢性方正非公事  
不入公門咸稱爲閉戶先生顧忠憤老而彌篤寇躡中  
原率子姪僮僕宿守城頭晝夜罔倦每日五誓不與賊  
俱生城陷遂沒兩瑩交請褒恤會國變未果所著有公  
車紀行問蛾篇迴月樓集閒閒語行於世

石元聲字九成別號雲璈中崇貞癸酉鄉試辛巳之變  
衆聞寇入城咸鼠竄元聲獨率家僮執銳登城與寇鏖  
戰不勝遇害撫按錄請褒恤未果

王延佑王星房皆諸生城陷同以罵賊不屈死

葉正芳官衛百戶張泰運官衛千戶勦流賊于鐘已舖  
衆寡不敵力戰死



張如蕙字又樹崇貞甲戌進士授戶部主事權河西務  
有清介聲改兵部武選司郎中掌選事時交多受賄舞  
文單寒壅遏如蕙一依資俸先後吏不得上下其手陞  
江南壽潁道寇氛充斥督兵擒勦屢著奇功晉秩太僕  
寺正卿致政歸以詩酒自娛從不問戶外事鄉里賢之  
年六十四卒弟如芹字澹石以恩貢選宣城知縣

張振猷庠生慷慨尙義崇貞十四年流寇李自成黨攻  
州城振猷守堞城陷被執賊見儒冠強之降免死振猷  
罵口賊奴殺卽殺耳安有朝廷養士而喪節受降者乎  
賊怒將殺之一賊曰殺之無益盍囚之竟以針縫兩目  
縛於車上載至荊州禁錮數載振猷備嘗苦楚終不爲

屈賊平荊州守釋之令乘驛回籍鄉黨稱爲義士

袁崇讓生而峻偉膂力過人當明季流寇方張有梟賊劉扁子據平頭塚來攻崇讓約結敢死之士同心守城時有州人韓朝陽者本紳士張某家僕性最雄桀因過被逐投入賊營用爲總兵官朝陽素知崇讓技勇說賊首曰如得袁某爲助則城可破也因設計執之勸之降崇讓罵不絕口誓不從賊怒重杖囚之崇讓僞降乃密修書遣使回報諸同事乘其無備攻之已當爲內應則賊可擒也賊覺搜其書立斃之拋屍於井

國朝

劉粹芳號航石永泰子天資英敏營年食糧賊亂冠軍

諸先輩競以大器勸之天性孝友侍父疾願以身代生  
平詩文甚富續修舊志後以明經任武進知縣註誤解  
任子樞字岸先康熙庚戌進士授廣宗知縣下車卽周  
詢民隱嚴爲禁革百姓競頌之陞西河知州以疾卒於  
官

戴玕字去瑕大資敏異爲文不蹈襲前人一字十赴赫  
闡三中副車僅領歲薦老年尤嗜學手不釋卷一時英  
俊悉出其門著作甚富年七十七卒

張鵬翼字雲閣文宗先正書法右軍領順治戊子鄉薦  
初任鄆城教諭陞廣西富川知縣寬嚴並濟吏畏民懷  
旋以註誤歸里食力著書爲後學矜式

周諫祖字念亭戊子拔貢任江西安福知縣甫及期以漕逋誣誤士民懷之立有去思碑

余廷俊明威將軍余進昇之第三子少負大志勇力過人年十大入武舉順治二年貝勒王南征路經長臺關訪求善射之士以備任用廷俊謁王王試其能左右射大加稱賞隨給劄付授千總職銜及攻湖南辰州府苗寇廷俊有奪纛先登之功擢沅州府鎮標守備兼中左兩營事康熙二年陞福建興化府遊擊引見稱

有命渡海隨征臺灣累建軍功至大別山之東以力戰亡於陣主將重其忠義以禮優恤之

明李思齊初爲縣吏起義兵捍鄉寇累著奇謀至正間爲四川右丞封許國公進太尉洪武初歸附從大將軍征定興有功授江西行省右丞進中書平章卒太祖親爲文祭之詔從祀功臣廟

尙褫字景福正統己未進士授行人擢南臺御史會掌院都御史周銓貪污不法褫偕諸御史范霖等合疏劾奏銓下詔獄銓亦奏辯諸御史俱被逮會銓遘病卒事未白於是並謫諸御史褫得謫雲南驛丞量移豐城知縣爲邑豪所誣繫獄先儒吳與弼有重名授詩當事以解之其詩曰雲擁金鰲撥不開九天捧出德星來黎民喜睹青天白循吏愁聞白晝雷爲政但存方寸地謀生

不用半分財遙知令尹清如許絕勝江南庾嶺梅穠用  
是得釋而名益重後陞湖廣僉事卒

王鳳顯洪武初授管軍上千戶從征陳友諒死於鄱陽  
湖贈武節將軍驍騎尉追封羅山縣子建祠康郎山祀  
之

趙時中字宜之剛毅沈靜有大節成化甲午舉鄉薦授  
益陽知縣擢御史巡按江北風裁凜然正德初逆瑾擅  
權中外爭附之時中竟不阿瑾遂中以他事逮至都廷  
杖落職父喪哀毀幾滅性既葬廬墓側朝夕泣奠三年  
有鳩來巢事聞詔旌表其門

黃端生字純篤性嗜讀書父官縣尉早喪事母以孝聞

母歿負土爲墳寒暑不輟廬墓側三年不歸夜有賊至其所端以衣與之賊不受而去

張杰字朝英二親相繼歿廬墓六年墓地高故無水一日墓傍湧泉清冽不竭邑紳劉鎰趙時中俱爲詩紀其事縣官楊鉞賈璘皆詣廬旌禮焉

徐廷章字公器性豪邁有才畧登景泰辛未進士拜刑科給事中時錦衣指揮門達有寵橫恣羅織大學士李賢幾爲所中事敗上命廷臣會鞠廷臣夙畏達無敢言者廷章忿然叱校士刑之達乃伏辜由是直聲震于中外累陞都御史巡撫寧夏故無邊墻數有警急廷章始爲修築塹山湮谷長數百里嘉靖間輔臣楊一清疏云

寧夏花馬池東至延綏安邊營西至寧夏黃河邊橫城  
堡一帶地方綿亘四百餘里內外黃河黃沙野草彌望  
無際無高山巨壑爲之阻扼成化初年未有邊牆誠所  
謂膏肓之疾腹心之害也後巡撫寧夏都御史徐廷章  
始奏修之云云蓋深高其功也

胡瀛字孟登成化乙未進士授餘姚知縣明敏廉介有  
應變才適日本來朝所過驢然瀛預市瓦器實以魚菜  
餅糗至卽給之得飽殊驢皆踴躍去歲饑悉發廩以賑  
仍奏免田租之半時監儲督折銀甚急瀛罷弗徵坐罰  
俸又弗徵明年秋成始下令徵折銀民皆競入曰勿復  
累我侯也居數年以憂去百姓爲立碑紀德服除改武



進尋擢南京戶部主事員外郎以忤權貴謫興國同知  
遷浙江僉事興國人思之爲建祠與謝疊山先生並祀  
王文成公爲撰碑記子止進士官御史能世其家聲

劉可字以中正德辛巳進士授南京主事歷轉鎮江知  
府鎮江故有織造例呈樣緞於府自可革之直指按部  
郡守以下皆庭謁長跪可預約諸郡守毋跪及見諸郡  
守復跪可獨長揖直指心忌可然陽浮慕之尋陞九江  
兵憲歷山西布政所在有治績竟以忤權貴乘大計罷  
歸雖官至二品環堵蕭然其操履端介如此

尙維持字國相嘉靖庚子領鄉薦第一明年登進士授  
廬州推官擢御史巡鹽河東修舉鹽政浮於常額會歲

歎捐其羨金活饑民以萬計繼按蘇松當倭寇殘破之後爲畫長策建沿海五城永絕倭患維持故高才能文章按部之暇時課士如大學士王錫爵申時行皆其所賞識也後陞陝西副使提督學校銜鑒無爽秦晉賢豪多出其門旣致仕歸拓大學宮建大通橋置一本田以贍族人卒祀鄉賢

劉廣生字載甫萬厯丁酉領鄉薦辛丑舉進士授南京刑部主事陞本部郎在曹讞獄明允奉詔決囚平反甚多擢常州知府挫擊豪強奸頑屏跡月三課士人文蔚起舉天下卓異第一晉兩浙督學使以病告回籍後補慶陽兵備道防禦有法邊境獲安累陞陝西左右布政使時流

氛初熾廟堂議非廣生莫可辦賊遂擢巡撫選將練兵  
廣設方畧所招撫大寇王左掛點燈兒等剪其餘黨復  
以疾乞歸後起戶部左侍郎召對平臺稱旨陞南京刑  
部尙書卒年七十有五所著奏疏詩文甚富子五人慶  
謙進士官杭州知府亦有治聲

劉容字汝太生而恬澹無所好嘗慕徐孺子非力不食  
之義刻意向學家貧恒教授以養父母嘉靖庚子舉於  
鄉遊南雍宿正陽主人婦少而寡夜就容婉轉誘之故  
作暴疾狀呼童篝燈煎藥味爽馳去僮爲人言終不洩  
也妻姜歿不再娶選黃州通判黃號難治而叛專饋料  
逋負至二十餘年務以至誠開諭不事鞭笞爭先輸納

他郡糧不完及錢穀焚贖亦以委之立辦監兌蘄州黠  
吏悍卒相戒斂戢容布袍蔬食不殊寒士擢同知監收  
船料夜泊蘆州賊拔刀突至詢知爲容叩頭謝過仍衛  
送出境擢南京戶部員外郎士女攀臥號哭爲立生祠權  
關杭州公私稱便值滿考擢知廣南府貧不能行疾作  
乞休歸

劉啟東字伯揚號柳溪少穎敏讀書日記數百言治春  
秋從遊者甚衆正德丁卯舉鄉試第一謁選高淳知縣  
行取擢知忻州調同州未幾選西安府同知總制唐議  
保甘肅兵備疏未上遷運同丁內艱服闋補河東運使  
同情理離法竊賈稱便擢知寶慶府逾年卽致仕歸年

八十二卒

劉士蘭字奎瞻少喪父母事庶母陳十年無異所生歲大饑出粟數百石賑之中順治丙戌進士任山東肥城知縣剛方廉靜在肥九年民愛戴之行取授刑部主事歷本部員外郎中治獄多所平反出守山東東昌府東都素苦逃人之累每一株連動至亡家破產公至嚴行捕緝逃人皆自出首數月得三百餘人陞陝西驛傳道歷左右通政皆有異政以年老告歸

劉夢興字凝仲生而端嚴簡重寡言笑人不敢干以私領癸酉鄉薦授衡州司李不侮鰥寡不畏強禦發奸摘伏如神有清畏堂說以自誓遷衡州府同知衢人誦之

陞漳州知府時閩海初定人鮮知禮公身先矩矱以倡導之著有茗柯集十卷年七十三卒

畢拱垣字元昭居父喪哀毀踰禮事繼母何以孝聞居鄉與衆無忤善詞賦走筆立就知瓊山縣甫三月而卒徐自植字爾立號扶尹少好學屢舉不第以歲薦貢選魯山訓導平生慕陶元亮之爲人名其里曰南村怡然自得寬厚淳謹與物無忤鄉里稱之

劉其振字仁趾生母早歿事嫡母焦以孝聞天資純粹與人交久而彌篤戚友貧者周濟之不能舉婚嫁者善成之不樂仕進常語子弟多讀書則眼明善受虧則福

劉其錫字天予父遊宦遠方事母至孝少穎悟有遠志  
髫年卽舉於鄉癸丑成進士授中書未任卒





汝寧府志卷二十

游寓

漢董永千乘人也少失母漢末奉父避兵寓居汝南家貧傭耕後徙安陸父亡無以葬乃從人貸錢一萬日後無錢還當以身作奴葬畢忽道遇一婦人求爲妻永與詣錢主令織縑三百疋以償一月而畢辭永去乃曰我天之織女緣君至孝天帝令我助汝償債言訖凌空而去郭泰字林宗太原人少游汝南先過袁閔不宿而退往從黃憲累日方還或以問林宗曰奉高之器譬諸汎濫雖清而易挹叔度汪汪若干頃陂澄之不清淆之不濁不可量也

何濃字伯求南陽襄縣人少游學洛陽濃雖後進而郭林宗賈偉節等與之相好顯名太學及陳蕃李膺之敗濃以與蕃膺善遂爲宦官所陷乃變姓名亡匿汝南間所至皆親其豪傑有聲荆豫之域袁紹慕之私與往來結爲奔走之交黨事解濃辟司空府每三府會議莫不推濃之長累遷其官董卓秉政以濃爲長史託疾不就乃與荀爽王允等共謀誅卓會爽薨濃無援事遂寢王粲字仲宣山陽高平人祖父龔爲汝南太守粲少有異才嘗請左中郎將蔡邕邕倒屣迎之因天下亂往依劉表於荊州表卒粲勸表子琮降魏後魏武辟爲掾封關內侯與鄴中七子之列建安二十一年從太祖征吳

二十二年春道病卒粲嘗寓居汝南有粲宅

晉祖述字士雅范陽人輕財好施忼慨有節向與劉琨情好綢繆共被同寢中夜聞鷄鳴蹴琨覺曰此非惡聲也因起舞述琨並有英氣每語世事或中宵起坐相謂曰若四海鼎沸毫傑並起吾與足下當相避於中原耳及京師大亂述率親黨數百家避地淮西以所乘車馬款同行老疾躬自徒步藥物衣糧與衆共之又多權畧是以少長咸宗之推述爲行主故今信陽有士雅山

唐張懷素不知何許人寓居申州時廣平高正臣習右軍書法睿宗甚愛之與懷素有舊正臣嘗爲人書十五紙懷素戲換其五紙合示正臣再看不悟客曰有人換公

書正臣笑曰必是張公也乃詳觀之得其三紙客曰猶有在焉又觀之竟不能辨正臣嘗許人書一屏障逾時未獲其人出使淮南臨別大悵惋正臣曰僕故人在申州與僕書一類公可使往求之

**宋** 穆修鄆州人徙寓汝陽嘗受業于种放真宗東封以經明行修之士賜進士出身調泰州理掾恃才忤監郡得罪遇赦改潁州文學叅軍時學者從事聲律修獨以古文爲倡一時士大夫翕然稱之

楊億字大年蒲城人剛介寡合文士咸賴其品題爲翰林學士開別墅於陽翟居疾因而游寓汝陽有退居汝

任諒字子諒眉山人徙汝陽九歲而孤舅欲奪母志諒  
挽衣泣曰豈有爲人不能養其親者乎母爲感動而止  
力學自奮年十四登高第調河南戶曹蔣之奇章奏薦  
爲編修官徽宗見其所作新學碑曰文士也擢提舉夔  
州路學事改轉運判官著河北根本籍凡戶口之升降  
官吏之增損與一歲出納音贏之數上之朝遷提點京  
東刑獄加直秘閣龍圖閣直學士知京兆府以母憂去  
宣和七年提舉上清寶籙官修國史初朝廷將有事於  
燕諒曰中國將有憂乎後果如其言

陳慥字季常號龍邱眉之青神人風格凝峻議論慷慨  
尚氣節少遊太學時朝廷起大儒安定胡瑗以範多士

卷二十一  
隨爲其高弟詔取賢良愷乃力辭願授其族之未祿者  
幘巾窮巷自若也戶部尚書李公常素與相友善欲以  
其名薦於上丐一處士號愷懇却之蘇軾傳曰方山子  
光黃間隱人也少時慕朱家郭解爲人間里之俠皆宗  
之少壯折節讀書以此馳聘當世然終不遇晚乃避於  
光黃間曰岐亭菴居蔬食不與世相聞時人謂之方山  
子

金麻疇字知幾易州人弱冠入太學有文名南渡後寓居  
鄆蔡間入遂平西山興定末試開封府詞賦第二經義  
第一再試南省復然聲譽大振雖婦人小兒皆知其名  
後遷翰林文字九疇自度不能與世合遂謝病歸

元竇默字子聲肥鄉人避兵客蔡州遇名醫李授銅人針法金八蔡又走德安聞伊洛之學與許衡友善尋以儒顯累官昭文館大學士卒年八十五贈太師封魏國公

明陳演字道易長洲人善畫工八分書僑居汝河之東岸櫻桃園常游蜀所書蜀道碑書法冠一時人爭購之卒

葬於園旁著有詩數卷

張桓字彥威真定藁城人父木知汝寧府因家焉桓以國子生釋褐入補中書掾累官陝西行臺御史以言事不合去未幾汝寧盜起桓避居確山賊知其名襲獲之并請爲師弗聽因六日乃擁至渠魁前桓直據榻坐與之抗論逆順其徒粹桓起揖桓瞋目曰吾恨不能手斬

逆首肯爲汝賊折腰仰天大呼叱罵益厲賊怒刺殺之  
後語人曰張御史真鉄漢害之可惜事聞贈禮部尚書  
謚忠潔

張琪字惟潤寧國人舉賢良除明州知府改建縣宇作  
興學校躬率甲士平海寇有功授階亞大夫力請致仕  
徙籍信陽泉石自娛足跡不及城市

### 方技

漢蔡父汝南人善相人術翟丞相方進幼孤給事太守府  
爲小史數爲掾吏所詈辱迺從蔡父相蔡父曰小史有  
封侯骨當以經術進其努力爲學問方進旣厭爲小史  
聞蔡父言心喜遂棄去西遊京師卒以丞相封侯



故藏金以待太平所以不告者恐金盡而困無已也知  
吾善易故書版以寄意耳金有五百斤盛以青瓮覆以  
銅梓埋在堂東去壁一丈入地九尺妻還掘之皆如卜  
焉

郭謩西平人少明易苻堅末當陽門覆刺史梁熙問謩  
曰其祥安在謩曰當有外國二王來朝一當返國一死  
此城歲餘而鄴善及前部王朝於苻堅西歸鄴善王死  
於姑臧呂光之王河西也西海太守王貞叛謩勸光襲  
之光之左丞呂寶曰千里襲人自昔所難謩曰若其不  
捷謩甘伏斧鉞之誅如其克也左丞爲無謀矣光從之  
果克

隋董展字伯仁汝南人。以才藝稱鄉里。號爲智囊。官至光祿大夫殿內將軍。尤長於畫。雖無祖述。不愧前賢。風德名流見者失色。與展子虔齊名。曾作道德經。變相爲時所稱。

宋楊大均蔡州人。善醫。能默誦素問本草及兩部千金方。

四書一字不遺。與人治病。疹脉不出藥。但云此病若何。當服何藥。在某部第幾卷。卽取授之。分兩不差。葉慶得在蔡州。親見其事。嘗問素問有記性。或能誦本草。則尤難矣。至于千金。但藥應與分兩劑。科此有何義。而能記乎。大均言古之處方。皆因病用藥。精微深妙。苟通其義。其文理。甚于章句。何可妄也。大均本染家子。事父孝。醫

不受謝積其齋施之餘葬內外親三十八卷方宣和間  
道教盛行自匿名跡蔡魯公聞欲廷致之使者數十返  
不得已一往留數日卽歸不受一錢蔡州陷後聞北人  
知其名厚禮之與之俱去不知所終

明房景敏汝陽人侍郎安之猶子也幼聰慧與兄景敷共  
鉛槧屢試不售乃慨然曰丈夫不爲良相則爲良醫遂  
潛心素問難經而通其奧又泰用仲景河間諸名家術  
爲人療病隨手輒效然初不拘拘於古方也其四代孫  
文實以郡庠生世其業尤善察脉能預知人生死不爽  
時刻與同郡石昊齊名並稱國手所著有春田一覽行  
於世

秦潮汝陽人蚤脫俗累隱於汝郎之間孝弟力田絕跡  
城市壯年妻喪遂不娶慕喬松之術南遊衡嶽匡廬西  
抵終南太華遇異人授以秘訣兼通太乙奇門諸數於  
天地風雲人生休咎占驗無爽或爲人卜葬有所得輒  
隨手散給貧兒一夜有盜窺其藩輒眩瞖欲死更他盜  
往亦然蓋潮以術制之也太史李本寧嘗賂以詩有長  
謝一邱遊五嶽手揮白日拂蒼烟終南匡廬探幽秘遂  
有仙人授奇字之句年九十六無疾而終孫鎬國學生  
以詩文名見卓行傳

方日中郡之諸生少有操行父所遺美田園盡讓諸兄  
弟而獨取其薄者偶得邵康節皇極數一書潛心推算

遂洞其術爲人決事輒驗友人李一僞歲試畢從日中  
占得一蛛落帽之象斷日當有一人居其首而君次之  
後果然周生基問病象見一牛無首曰牛無首安得生  
乎於字爲午月乎仲夏基竟死他如李太守復初之領  
解趙方伯壽祖之登第無不奇中賓客輻輳戶外之屐  
常滿預定其死期至日端坐而逝

張儒字宗道上蔡人家有邵康節皇極數一覽卽悟爲  
人決休咎無不奇中領宏治壬子鄉薦三場題目皆預  
書置一函中戒家人勿泄一發封悉驗衆驚異以爲神  
年三十三卒當未卒時妻孥環泣以門戶爲憂儒張目  
曰我家已有靈芝矣蓋其猶子惟恕方在孕也後惟恕

官至御史

仙釋

周任光者上蔡人善餌丹賣於都市里間積八九十年乃知是故時任光也趙簡子聘與俱歸常在栢梯山上後不知所在

嘗長房汝南人爲市掾有老翁賣藥於肆市罷輒跳入壺中市人莫之見獨長房於樓上見之異焉因往再拜奉酒脯翁乃與俱入壺中惟見玉堂嚴麗旨酒甘醪盈衍其中共飲畢而出後乃就樓上候長房曰我神仙之人以過見責今事畢當去子寧能相隨乎樓下有少酒與卿爲別長房使人取之不能勝翁笑而下樓以一指提之而上視器如一升許而二人飲之終日不盡長房

遂欲求道而顧家人爲墓乃斷一青竹度與長房身齊使懸之舍後家人卽以爲縊死大小驚號長房立其旁而莫之見也於是遂從入深山踐荆棘於羣虎之中留使獨處長房不恐又卧於空室以朽索懸萬斤石於心上象蛇競來齧索且斷長房亦不移翁還撫之曰子可教也復使食糞中有三蟲臭穢特甚長房意惡之翁曰子幾得道恨於此不成如何長房辭歸翁與一竹杖曰騎此任所之又與一符曰以此主地上鬼神長房乘杖須臾來歸自謂去家適經旬日而已十餘年矣卽以杖投葛陂顧視則龍也家人謂其久死不信長房曰往且所墓但竹杖耳乃發棺視之果然遂能醫療衆病輒



筭百鬼或在宅坐獨自恚怒人問其故曰吾責鬼魅之  
犯法者耳又嘗坐客而使至宛市鮮須臾還以飯或一  
日之間人見其在千里之外者數處後失其符為象鬼  
所殺

桓景汝南人隨費長房游長房謂曰九月九日汝家當  
有災宜急去作絳囊盛茱萸以繫臂登高飲菊花酒此  
禍可除景如言舉家登山夕還見雞犬皆死令世人九  
日登高飲酒婦人帶茱萸囊始此

張皓字文明汝南人永中初年二十預逸人選師封衡  
厯試財色鰈鯨不變乃授皓青要紫書金根上經神丹  
數銖皓入赤城山白鶴飛雲搏空游虛人莫得見魏太

和尙登真

董仲求子也母天女生而靈異數篆符驅邪嘗游京山  
潼泉鎮蛇毒篆石尚在京山之陰後仙去

晉許遜字敬之汝南人博通經史尤嗜修煉之術舉孝廉  
爲蜀旌陽縣令歲饑嘗點瓦礫爲金俾民得輸負租爲  
符咒以治病活數千人以世亂棄官與吳猛同遊江左  
謁王敦敦意不善乃隱形去後得飛步斬邪之法時西  
安有蛟物上遼有巨蛇爲民害遜皆斬之至豫章復有  
老蛟及其黨甚衆遜踪跡得之斬除無遺又鑄鉄爲柱  
下施八索鈎鎖地脉由是水妖絕迹遊韶陽柳衡諸郡  
除害尤多太康二年已一百三十六歲矣忽一日羽蓋

僮車自天而下登車與其弟子家屬四十二口同時昇  
舉雞犬亦飛去

許邁字叔元遜之從弟也未弱冠時嘗造郭璞璞爲之  
筮過秦之上六爻曰君元吉白天宜學升遐之道時南  
海太守鮑靚隱跡潛遁人莫之知邁乃往候之探其至  
要父母具存未忍遽違乃築舍餘杭懸霑山往來茅嶺  
以尋仙跡朔望還家覲省父母旣終遣婦還家遍遊名  
山採藥服氣乃改名元字遠遊移入臨安西山寄書與  
婦告別又著詩一十二首自後莫知所終人謂其羽化  
云

許穆亦遜之從弟也入華陽洞得道遇西王母女雲林

夫人降教之得爲佐卿仙侯幼子羽小字玉斧爲侍宸  
仙翁後雲林夫人與穆書云玉醴金漿交梨火棗當與  
山中許道士不與人間許長史

文宏蔡州人夫婦同處不知其甲子者舊見之約年八  
九十矣常若五十許人去邑數里有田百畝自耕耘凡  
春秋田止種一色例必倍收卽凶年亦然募里中貧乏  
輩傭寄其家約日與費以充傭值鄉人服其義莫之欺  
也或疑其有道術哀求之乃遷避遁逃或旬月或經歲  
不可見咸疑仙去大中祥符初太府少卿蔡汝典郡下  
車之日命牙校邀之言前守眉州時遇青城隱者托以  
達信宏爲牙校所迫不得已偕至郡齋每行必杖策先

其牙卒鞭馬逐之不能及相去常百步許蔡公咨以化民之道修身之術對曰六籍載之備矣外復何求乘間訪以黃白事咲而不答數日求去蔡公厚遺之悉無所受既歸語其鄉黨曰吾將遠遊亦未敢期回日幸各自努力也一日携其妻潛去莫知所往

〔陳〕天嘉初僧知顛來謁慧思一見卽謂昔靈鷲同聽法華經今復來矣卽示以普賢道場說四安樂行師八觀三七日身心豁然思曰非汝弗證非吾莫識

〔唐〕應夷節汝南人生不喜茹葷長游天台龍虎山師馮惟良得上清大法棲真天台之道元院日誦黃庭大洞二經爲人致福忽一日沐浴入靜凝神解化是夕清香馥

郁猿鳥悲鳴及就定視之但空棺而已

皇甫元真者貌甚都雅衣白若鷺羽高瑀在蔡州時有軍將田知廻欠官錢數萬憂迫計無所出至外縣去州三百餘里其類十餘輩爲設酒食開解之皇甫但微笑曰此亦小事衆散乃獨留謂田曰予嘗游海東獲一寶物當爲君解此難田謝之請具車馬悉辭行甚疾其晚至州舍於店中辰謁高高一見不覺敬之因請高曰元真此來特從尚書乞田性命高遽曰田欠官錢非瑀私財如何皇甫請避左右曰某於新羅獲一巾子避塵欲獻此贖田卽於懷內探出授高高纔執已覺體中虛涼驚曰此非人臣所有且無價矣皇甫請試之異日因寢

於郭外時久旱埃塵甚高顧視馬尾鬣及左右騶卒數人并無纖塵監軍使覺問高高不敢隱乃與俱往見皇甫監軍戲曰道者獨知有尚書乎更有何物願得一觀皇甫於巾上抽一鍼與之鍼金色大如布鍼監軍仍劑於巾試之驟於塵中塵惟及馬騶尾焉高與監軍日日禮謁將討其道要一夕忽失所在矣

元楊道和上蔡人生而奇異有相人者見之曰此子仙風道骨非風塵中人矣及長棄俗修道寓蔡之白雲洞中復值異人授以仙訣至元初忽白日翀舉後有人見之淮上者

明張一中汝陽人承樂初遇異人授金丹之術結廬城南

日餌杏丹一粒與侍郎趙毅高士金子齡游處殺嘗貽  
之詩云寄語城南張處士一中造化要平分宣德間年  
八十六出其書火之俄然而逝逾四十日就殮顏色如  
生識者以爲尸解又父老相傳毅使交趾至雲南一古  
驛有彈琴斬魅之事卒於途及殮衣忽上舉棺不得合  
有一道士來噴水咒之始合亦異事也

楊布袋者不知何許人蓬頭跣足體有癩痕然狀貌綽  
約若處子終夏繫一衲若布袋然故人呼爲楊布袋渠  
亦自謂楊布袋云嘉靖戊戌游行汝南村落間爲人治  
病第以手按摩或布氣攻之病輒愈懷安莊惠王慕樂  
之館於邸中時邸中數有怪楊夜召惟叱責使去惟遂



絕王愈加禮重嘗與客試其術能百日不食亦能一日  
百食履水不溺入火不焚冬月呼取鮮桃輒有桃連枝  
墜下爲王壽王食之甘芳盈頰伍將軍汝忠爲兒時病  
瘖幾殆其家以謁楊楊曰是兒當不死且有一金幣遂  
與共卧者累日病霍然已後爲寧夏游擊將軍果橫金  
也一日請懷安王告去王不聽乘夜逸去王令數騎追  
之及於朗陵贈之百金不受曰我自有餘乃蹴地金色  
爛然竟去莫知所之明年有邢半仙者抵汝覓楊曰是  
宋將楊業之裔爲統制同文丞相敗元軍宋亡入山得  
仙云

行源者上蔡人爲郡開元寺都綱頗知詩慕慧遠道林

之爲人嘗與士大夫遊處年七十餘能夜寫法華經不  
然燭後於嘉靖初化去

海天法師者名宗浩上蔡人嘗遊普陀少林諸名山歸  
而駐錫邑之福興寺登壇說法大闡宗風已說去閱藏  
於朗山數年著教海要錄行於世其自序云佛之法身  
本無生滅因應機以示生由緣畢而入滅其示生也後  
身菩薩任堯率天爲化物託白淨之官酬願力現黃金  
之色厭處三殿遊玩四門天王捧白馬而逾城給使持  
寶冠而詣闕入仙林而抽簪適禪河而晏坐六年苦行  
十力智圓魔兵靡卷至覺道成其說法也四十九年三  
百餘會阿含方等間四諦爲大乘之始般若法華引三

根入實相之門本懷旣述便唱涅槃原始要終五千餘  
軸此土撰集百有餘帙廣擴若空汪洋如海予以管窺  
螺約之量採集纖微之文目之曰教海要錄總列二十  
四部以彰其本別開聲韻條陳用顯其末攝末歸本靡  
所不在間有文義餘缺皆由識見狹促廣畧長短並無  
胸臆加減一篇一偈盡出于教海或事或理悉載於諸  
經望通人達士意莫是古非今將聖言爲凡詞只宜以  
又會義葉筌蹄而取魚是矣依了義不依不了義也萬  
曆九年化去年八十餘